

# *MOLIMO E LENG*

## *MORUI OA MOHAU*

 Le ka lula fatše. Ke ne ke...kapa ho paka ho tsamaea, ho kena le ho bona Moena Moore le bohole mona kalaneng, metsoalle eo ke e tsebileng lilemo tse ngata hakana. Ruri ke monyetla ho ba bona mona bosiusing bona. Ke ikutloa bootloana ho ema mona le ho bua le baithuti ba bakaale ba thutabomolimo ka morao ho 'na, ha nka fosa ba ka ntokisa. Ke tšepa joalo.

<sup>2</sup> Re thabile haholo bosiusing bona 'moho le motho ea itseng mona, Khaitseli Rose. Re ne re theoha...Ke le 'moho le Moena Shores le mothusi oa hae, kajeno, lijong tse nyenyane. 'Me tseleng e theohang, Moena Williams a tlaleha Khaitseli Rose a kula haholo. Eaba re kena ho 'moha nakoana feela, ho khumama fatše. 'Me a tšoeroe ke feberu e holimō, a hlile a kula. Mantsoe a 'maloa feela a thapelo, 'me Morena a bua le rōna, le ho re, "O tla fola." Ho re, "O tla ba teng hosane bosiu," ba rialo. 'Me ke enoa bosiusing bona, o lutse hantle mona. Ke hantle.

<sup>3</sup> Khaitseli Rose, ema motsotso feela, e le hore ba...Re leboha Morena. O ne a robetse betheng. A re, "E—e liabolosi o nketile pele nthong e 'ngoe le e 'ngoe. Ke theohetse mona eaba ke tšoaroa ke sena," mofuta oa lefu la 'metso, le joalo. Empa Morena o mo fetisitse, re thabisitsoe ke hona. Ho leboha Morena ea ratehang!

<sup>4</sup> Joale esale re kene menyakeng. 'Me hosane bosiu, joale, re fetela koana e—e Ramada. 'Me le se lebale joale, ha e mona hosane bosiu, e tla ba Ramada. 'Me seboka se qala bosiu bo hlahlamang. Le tlameha ho 'mamella bosiu bo le bong hape, le a tseba.

<sup>5</sup> Ka hona maobane bosiu ke—ke ile ka fapoha sekala hole, ke batla ke iketselitse tsepiso, ho tloha la ho qala selemong, ke tla poma Melaetsa eo ho tloha ho lihora tse tharō kapa tse 'ne, tse hlano, ho fihla mohlomong ho metsotso e mashome a mararō kapa e mashome a mane. Le joalokaha ke le boleletse maobane bosiu, mohatsa ka o nthoholelitse Sontaha, ho re, "U bile khabane." Ka hona—ka hona, ehlide, eaba ke fihla maobane bosiu ka e senya, le a bona. Empa ka nka metsotso e mashome a mahlano le metso e mehlano, sebakeng sa mashome a mararō, maobane bosiu.

<sup>6</sup> Ho theoha, bosiusing bona, Billy o itse, "U tlil'o bua ka'ng?"

<sup>7</sup> Ka re, "Be, ke ngotse lintlhana mona, le Mangolo a 'maloa. Ha ke tsebe, tse ling tsa tsona, Melaetsa e ka bang mene kapa mehlano e fapaneng." Ka re, "Ke a utloa ha ke fihla tlase mane, le ho bona se etsahalang."

<sup>8</sup> Ho re, "U tšepisitse ho rapella batho bao bohole ba kulang."

Ka re, "E, monghali. U tšoere litlankana tse kae?"

Ho re, "Makholo a mabeli."

Ka re, "Ke mpe ke li qale, bosiusing bona."

<sup>9</sup> 'Me a re, "Joale hopola, u fumana metsotsotso e leshome le metso e mehlano feela ho bua." Ho re, "U sebelisitse e meng maobane bosiu." [Moena Branham le phutheho ba tšeha—Mohl.] Re tlameha ho potlaka, ha ke a lōkela na?

<sup>10</sup> Be, re le tšepisitse, re tla rapella batho bao ba tšoereng litlankana tsa thapelo, 'me re—re tlamehile tšepisong, ehlile. Re ka sitoa ho ba fetisa bohole meleng ena, hape nka sitoa ho ba bitsa ka bomong, kantle letšoeleng. Leha Moea o Halalelang a ka mpha eona, nka—nka sitoa ho e mamella. E nkimela haholo feela. 'Me, empa bohole re tloaetse lintho tseo. Re a tseba Molimo esale Molimo. Ha se sona se folisang. Se mpa se haha tumelo feela, ho re tsebisa hobane—hobane re ka pel'a Sefahleho sa Oona.

<sup>11</sup> 'Me re tla etsa, bosiusing bona, ho rapella batho bao bohole ba kulang, e mong le e mong oa bao ba tšoereng litlankana tseo tsa thapelo, ho rapelloa. 'Me hosane bosiu, ke koana Ramada, re tla leka ho aba tse ling le ho qala ho ba rapella koo, hobane ke sa na le bosiu ba hosane. 'Me ke kholoa ke na le bosiu bo le bong ba seboka, mohlomong le borakefese. E itšetlehile kamoo lintho li tsoellang.

<sup>12</sup> Ba bang ba teng, e mong oa libui tse sa fihlang; le joale che, ha ke kholoe. Moena Humburg, kapa na eo... [Moena o re, "Amburgy."—Mohl.] Amburgy, Amburgy, Kash Amburgy. Ka hona ke—ke le fosa kahohle, ke lebitso leo la Sejeremane. Ke—ke a kholoa ke Sejeremane. Ka hona ke tlameha ho hela—ke—itlamela, ka polelo eo, tšoareleng tlahiso eo, litulong tsa hae.

<sup>13</sup> Re bile le monyaka o moholo Moreneng, le hona. Ho lōna bohole, ha baeti ba le teng mona bosiusing bona, re hlile re thabetsé ha le kene, le ho tšepa Morena a tla le hlohonolofatsa. Ke rapela ho se be batho ba kulang mohahong ha re tloha bosiusing bona, Morena o tla theoha ka matla a Hae a maholo le ho folisa bohole ba kulang le ba mahlomoleng.

<sup>14</sup> Mona nakoana e fetileng, ke ne ke kenya batho puisanong ea sephiri ka bomong, mathata a mang ao re neng re sitoa ho a fetisa. Eaba e tuma kapele, ho fihlela, Morena a tsoella ho e hlohonolofatsa, ho fihlela re emetsoe ke makholo a mararō kapa a mane, batho ba hlabehe kahobane ba lōketse ho ema. Nka re, nakong eo, u tlameha ho ema selemo kapa tse peli, ho e kenela, le a bona, lipakeng tsa likōpano feela, ho tšoaranana le bona puisanong ea sephiri. Re ntoo lula re emela Morena hofihlela A re joetsa bothata boo ka tšoanelo feela.

<sup>15</sup> Ntle le pelaelo mona ho lutse batho ba tsoang lipuisanong tsa sephiri. Na ba teng? A re boneng ha le phahamisa matsoho

a lōna. Lipuisanong tsa sephiri. E, ho lutse mono, ka hona, re a tseba ke 'neta. Re emela ho bona seo Morena a tlang ho se bua feela, seo bothata boo . . . 'Me ka ntoo tlameha ho e khaotsa mona nakoana e fetileng. Ka bolella Billy re tlameha ho khaotsa lipuisano tsa sephiri.

<sup>16</sup> Le a bona, ke—ke—ke sa tsoa tlola mashome a mabeli a metso e mehlano, haufi, khetlo labobeli, holimō koana ho a nanarela khetlo laborarō. 'Me ha u tsofala, khele, ha u khone, u . . . ha u sa mamella joaloka mehleng. Mehato ea hao e a khutsufala. 'Me —'me, ehlile, Moena Moore ha a tsebe letho leo hajoale. Eéna . . . ke a kholoa re batla re le lithaka.

<sup>17</sup> Empa metsi a mangata a phalletse le nōka ho tloha 'na le uena, le Moena Brown re fihlile mona khetlo la ho qala, le Moena Outlaw le Moena Garcia, le Moena Fuller. Ke a ipotsa na banna bao ba teng ka mona bosius bona? Moena Garcia, Moena Fuller, Moena Outlaw, ba teng mona? Phahamisang matsoho a lōna haeba le le teng. E, Moena Fuller ke eo, ke a kholoa, haeba ke sa fose. Moena Outlaw o ka mona. Moena Garcia, ke—ke a kholoa o falletse Phoenix. Ke a kholoa ho joalo. O—o falletse Phoenix, o koana California. Be, e kile ea eba matsatsi a maholo, le joale ke sa lumela Molaetsa o tšoanang le mohlang oo, "Jesu Kreste maobane, kajeno, le kamehla." Ke a kholoa e ka ba . . . Be, Becky e ne e le lesea. E ka ba lilemo tse leshome le metso e robong.

<sup>18</sup> 'Me joale o moholo, o holile, o nonne, ke ngoanana e mobe ea lutseng nqa e 'ngoe, oa lilemo tse leshome le metso e robong. U hokae, Becky? Moshaana, o tlil'o ntšebetsa. Ke sa hopola ke mo jere ka sephaka. Kea kholoa joale nka sotleha bosius bona ha nka leka.

<sup>19</sup> Hopolang koana kerekeng ea Moena Garcia bosiu bo bong, e ne e le mothoana feela. 'Me ka re, "Re tšoere kōpano ea machaba bosius bona." Ka re, "Ke bua le Masepanishi." 'Me ka re, "Mohatsa mona ke Lejeremane." Ka re, "Ke Moirishi." 'Me ka re, "Athe ngoananyana oa ka ke Leindia," e ne e le Becky.

<sup>20</sup> Eare ha ke tsoa monyako o kamorao, ngoanana oa Momeksiko a eme kantle mono, ho re, "Moena Branham!"

Ho re, "E, ratu, u batlang?"

Ho re, "Ha u hopole lesea hao le batla le sehlefetse ho feta, ho ba Leindia?" Moriri oa hae o mosehla, le a tseba.

'Me ka re, "Ke Leindia ka liketso feela."

<sup>21</sup> Be, re a leboha, seo, ho fihla mona bosius bona hape. Joale pele re atamela Lentsoe, a re atameleng Eéna, hoba Ke Lentsoe. Lentsoe ha le bonahatsoa, ke Eéna ka ho lōna.

<sup>22</sup> Joalokaha re ne re e tšoere maobane bosiu *Peō Ea Mofoka*, na le hlile la e ananela, lehlohonolo la Morena? [Phutheho e re, "Amen." —Mohl.] Ke—ke hlile ka ananela ho le tlisetsa Molaetsa. 'Me re bona seo lipeō li leng sona.

<sup>23</sup> Joale ebe kōpo e ikhethang e teng bosiung bona, e ikhethang feela? Bang ba lōna le tlang ho kena moleng oa thapelo, ho re, “Molimo, nkauhele. Ha ke tla rapelloa, tumelo ea ka e phahame ho khahlana le maemo.” ’Me—’me ekaba moratua oa motho mang, ea kulang, le se seng. Na u ka phahamisa letsoho Molimo o tle o nyarele le ho re . . . Joale haeba seo . . . Ha le tsebe kamoo ke ikutloang ha ke sheba mono. Shebang tlhoko e leng teng feela ka mona! Baena bareri, shebang seo feela. Le a bona? Joale, haeba ke ikutloa joalo, ebe Ntata rōna e mo etsa’ng? Ruri.

Joale ha re rapeleng.

<sup>24</sup> Jesu ea ratehang, joale re atamela Terone e khōlō ea mohau, ka Lebitso lena le bokhoni-bohle. “Hoba ha ho Lebitso le leng le neiloeng batho leo re ka bolokehang ke lona, haese Lebitso lena la Morena Jesu.” ’Me re tla ka Lebitso la Hae. ’Me re a rapela, Ntate oa Leholimō, U re amohele, bosiung bona, joaloka bana ba Hao ba lumelang. Le ho tšoarela ho se lumele ha rōna, Morena. E thusē bosiung bona, re tle re lumele Lentsoe la Molimo le leng le leng ka bottalo bosiung bona, mabapi le lintho tsohle tseo re li hlokang.

<sup>25</sup> U tseba se tlas’ā matsoho ana a phahamisitsoeng; maloetse a teng, a mang ekaba mathata a malapa, a mang ekaba mathata a lichelete, a mang ekaba mokhathala, ekaba ho khutlela morao mohaung, moetsalibe ea itseng. Tlhoko e ka bang efe, U ea fetisang sera sefe ka matla. Ka hona re a rapela, Morena, hore—hore bosiung bona, re tla elelloa hobane lira tsa rōna, se seng le se seng, li hlotsoe, esita le ho fihla ho lefu bolona. Le hobane re fetisa bahloli ka ho Eéna Ea—Ea re ratileng a ba a Inehela rōna, ho re hlatsoa Maling a Hae.

<sup>26</sup> Re a rapela, Morena, ho se lumele hohle, pelaelo eohle, pherekano eohle, hohle ho sa tšoaneng le Molimo, ho re balehele bosiung bona, Moea o Halalelang a tle a hape tōkelo ea tsela lipelōng tsa rōna. A ke a bue le rōna ka litsela tse mohlolo. A ke a bue le rōna ka Matla a Hae. A tsose bao ba—ba shoeleng moeeng, ho buseletsa ba kulang le ba mahlomoleng monate ’meleng, ho phahamisa mangole a tetemang, matsoho a tepeletseng a leketlang. ’Me ho fihle nako ea nyakallo.

<sup>27</sup> E ke e ropohe bosiung bona, Morena, ho tloha tulong ena ho ea Ramada Inn, le ho qala se seng sa liboka tse khōlōhali tse kileng tsa tšoaroa motseng ona. Morena, re sa phuthehile ’moho re rapela! U itse, “Ekare ha batho ba bitsoang ka Lebitso la Ka, ba phutheha ’moho ba rapela, Ke tla utloa Leholimōng.” Molimo, re a rapela ho be joalo, bosiung bona.

<sup>28</sup> Joale, Ntate, ha re bala Lentsoe, ha ho e mong ea ka Le tolokang haese Uena, U toloko ea Hao ka Seqo, re U rapela ho re tolokela tseo re li balang bosiung bona. Hoba re e kōpa ka Lebitso la Jesu. Amen.

<sup>29</sup> Joale bongata ba lōna ha bo batla ho tšoaea Mangolo ao moreri a balang. 'Me ke rata ha lōna, bosius bona, haeba le rata, ho phetla ho Baefese.

<sup>30</sup> 'Me Sontaha se fetileng ke buile ka Baefese, kamoo Buka ea Joshua e neng e le Baefese ba Testamente ea Khale, le kamoo e neng e le Buka ea topollo.

<sup>31</sup> 'Me topollo e tšoere likarolo tse peli tse fapaneng: "ho tsoa teng" le "ho kena teng." Pele, u tlameha ho tsoa. Batho ba bang ba batla ho kena le lefatše kahare; empa u tlameha ho tsoa lefatšeng, ho kena ka ho Kreste. U tlameha ho tsoa ho se lumeleng, ho kena tumelong. Ha ho letho le tlamehang ho u ema tseleng. Ho rua tumelo ea makhonthe ka 'nete, u tlameha ho siea ka bottlalo sohle se leng khahlano le Lentsoe la Molimo, ka morao, ho kena tumelong.

<sup>32</sup> 'Me eo e ne e le Buka ea Baefese ea Testamente ea Khale, Joshua. Mono, Moshe o ne a emetse molao, o sitiloeng ho boloka motho; empa mohau o khonne, 'me mona *Joshua* ke lentsoe le tšoanang le Jesu, "Jehova-mopholosi."

<sup>33</sup> 'Me joale ka hona, re iphihlela re fihlile ho Efese e 'ngoe, Efese e 'ngoe joale. Moo, seo, bolumeling ba rōna ba bohlalefi le lintho tse joalo, le ka mananeo ohle a rōna a thuto re fihlile ho—ho Jordane, ha ho le joalo re tšoanelia ho fumana e—e Efese hape. Re tšoanelia ho kenela exoda, ho "tsoa teng" le ho "kena teng," bakeng sa Hloibilo.

<sup>34</sup> Joale bosius bona re tla bala Baefese khaolo ea 2. Ke buile joalo le tle le fumane e—e sebaka, kapa ho phetla khaolo.

*Lōna, u le tsositse joalo, lōna le neng le shoele melatong le sebe sa lōna:*

*Tseo khale le neng le itsamaela ho tsona ka mokhoa oa lefatše lena, ha le ne le sa busoa ke morena ea busang matla a sebaka, e leng moea o sebetsang joale baneng ba ho se lumeleng:*

*Le rōna bohle pele re ne re tsamaea le bona takatsong tsa eona nama ea rōna, re ntse re etsa ho rata ke nama ea rōna le ke mehopolo ea rōna; 'me ka ho hlaha ha rōna re ne re le bana ba bohale, joaloka ba bang.*

*Empa Molimo, kaha e le morui oa mohau, ka baka la lerato le leholo leo o re ratileng ka lona,*

*Ha re ne re ichoeletse molatong oa rōna, O re pholositse hammoho le Oona, kapa, o re pholositse hammoho le Kreste, (hobane lōna le bolokehile ke mohau;)*

<sup>35</sup> Mono ke batla ho qotsa linthoana, kapa karolo ea temana, "empa Molimo," *Molimo E Leng Morui Oa Mohau*.

<sup>36</sup> Mona ke batla le lemohe moporofeta, moapostola, ke rialo, Pauluse, ea—ea, kamoo a bolelang sena, mokhoa, “U le tšositse joalo, lōna le neng le shoele. U le tsositse, lōna le neng le shoele, le shoele sebeng le littolong; ka ho itsamaela ka lintho tsa lefatše, takatso ea nama, le ho phethisa takatso ea kelello. O . . .”

<sup>37</sup> Phetoho ena e entsoe ke’ng, le a bona? ‘Me e entsoe ke’ng, “athe ka mohla o mong le na be le shoele,” ho ea tsosoa? *Tsosa* ho bolela “phelisoa.” Phetoho e hlahile, ho tloha lefung ho kena Bophelong. Ha ho letho le sele, ha ho letho le ka etsahallang motho ofe, le leholo hakaale, joaloka ho mo fetoloa ho tloha lefung ho kena Bophelong. Motho, holane a eshoa, ka nqa ea nama, ’me a ka folisoa ka nqa ea nama, ekaba ntho e khōlō, empa ha ho letho le fetisang haeba a shoele ka nqa ea moea Molimo o ntoo mo tsosetsa Bophelong.

<sup>38</sup> “Lōna le na beng, mehleng e fetileng, le shoele.” Le na be le shoele. Esita le bongata mona bosiung bona, ka mohla o mong, bo ka hetla ba bona kamoo le na beng le shoele. Empa joale hobaneng u sa shoa bosiung bona, joaloka mehleng eo? U lōketse joalo, hobane u ne o le moetsalibe, “empa Molimo E leng morui oa mohau.” Ke eona e—ke eona ntho eo, “Molimo O nong o ruile.” Lintho tsohle re na beng re le tsona, “empa Molimo”! Hoo ho entse phetoho hantle mono, “Molimo E leng morui oa mohau”!

<sup>39</sup> Oh, ke thabetse hoo haholo, ha E le morui oa mohau. Holane E le morui oa chelete feela, holane E le morui oa lithepa feela, etsoe A le joalo, empa koana ntho e khōlōhali ke ho ba morui oa mohau. Oh, ke lentsoe le leholo hakakang leo, kamoo re na beng re shoele.

<sup>40</sup> ‘Me re qoqile bosiu bo bong kamoo peō e tšoanelang ho shoa. ‘Me sohle se teetseng lefi leo la bophelo hare ha le a tšoanelha ho shoa feela, empa ho bola. Haeba e sa bole, e sitoa ho phela. ‘Me bola ke, “ho felisoa ka bottlalo; ho felile ka eona.” ‘Me pele re fihla moo menahano ea rōna le mohopolo oa rōna o felileng ka bottlalo o bolile ho rōna, lefi la bophelo le ka qala la phela.

<sup>41</sup> Joale—joale re ka tšoha, mona nka sunya thutoana feela, eo ke sa . . . Ekareha u sa e lumele, ke botle. Ke botle feela. Ke hlile ke a e lumela. Ke lumela hoba—hoba motho, ha a tsoalloa lefatšeng lena, ha leseanyana, le tsoalloa lefatšeng, u ke ke oa fihla mona e sa ba ka boitsebelopele ba Molimo, hobane Ke mohlokapeletso ‘me O tseba lintho tsohle. ‘Me ha lesea leo le tsoalloa lefatšeng, ntho e teng ka ho lesea leo. Haeba le tla rua Bophelo le ka mohla, nthoana e teng ka mono, ka ho ngoana eo, le a ikhopola, hang kapa hamorao. Peōnyana eo e ahileng ka ho lona. Joale ha u ka tšoara . . . Mangolo a hhalosa taba eo phatlalatsa.

<sup>42</sup> Joale haeba bosiung bona u ruile Bophelo Bosafeleng, haeba re ruile Bophelo Bosafeleng, esale re le teng, hobane tšobotsi ea Bophelo Bosafeleng e ‘ngoe feela. Haesale re le teng. ‘Me lebaka

leo esale re le teng, hobane re karolo ea Molimo. 'Me Molimo ke ntho e le 'ngoe feela e leng Bosafeleng.

<sup>43</sup> 'Me ho joalokaha Melkisedeke a amohetse karolo ea leshome ho Abrahama, 'me hoo ha balloa setloholoana sa hae, Levi, ea neng a le mathekeng a Abrahama; o ntšitse karolo ea leshome, hoba a ne a le mathekeng a Abrahama mohla a kōpaneng le Melkisedeke. Ke batla ho bua ka seo tulong se seng, hoseng ho hong. *Melkisedeke Enoa Ke Mang?* Joale elang seo hloko. Motšeо koana, Molimo o tsebile moshanyana enoa ea theohang. O tsebile lintho tsohle.

<sup>44</sup> Joale re karolo ea Molimo. Haesale u le joalo. Ha u e hopole, kahobane u ne u le bokhethi feela ka ho Molimo. U ne u lutse mohopolong oa Oona feela. Lōna lebitso la hao, haeba le kile la behoa Bukeng ea Bophelo, le behiloe mono pele ho motheo oa lefatše. O tsebile seo u nong u le sona.

<sup>45</sup> Ke mpa ke bua sena feela, e se ho lubakanya thuto, empa e le ho e batalatsa, re tle re sirōhele tšabo ena le tšohō. Ha le tsebe hore na le bomang. Ha se hona u tlang ho ba eona, empa joale le bara ba Molimo. Le a bona, esale le le bara ba Molimo. Le a bona?

<sup>46</sup> Hoba mohla Molimo o nong o u hopotse mohopolong oa Oona tšimolohong, u tlameha joalo, karolo e itseng ea hao, Bophelo ba hao bo ahileng ho uena joale, bo ne bo tlameha ho ba ka ho Molimo pele mono. Be, mohla O nong, le pele O fetoha ntho e ka angoang mona lefatšeng, le pele ntho efe e ba teng, haese Moliomo, u ne u le bokhethi bo bong ba Oona. O tsebile lebitso la hao e tla ba lefe. O tsebile moriri oa hao o tla nka 'mala ofe. O tsebile sohle ka uena. Ntho feela e etsahetseng ke mohla uena, ka ho ba moetsalibe . . .

<sup>47</sup> Bongata ba lōna le ka—le ka rerisana le 'na ka mohopolo ona. Mehleng ea boshanyana ba hao, kapa bongoanana, u ne u likoloha 'me lintho tse ling feela, athe li ne li sa hlophe bana ba bang, e ne e ka re ntho e ka ho uena e hlaba mokhosi. Molimo o no o le teng nqa e 'ngoe, feela u ne u le moetsalibe. Le sa e hopola? [Phuthetho e re, "Amen."—Mohl.] Ruri. Joale seo e ne e le eng? E ne e le tšobotsinyana eo ea Bophelo ka ho uena mohlang oo.

<sup>48</sup> 'Me haisa-is-a, ua utloa Evangeli. Mohlomong u ile kerekeng, oa thonaka *sena* le *sane*, le ho tloha bolumeling ho fallela bolumeling. Empa letsatsi le leng, ka ho ba karolo ea Molimo, u ne u tlameha ho ba karolo ea Lentsoe. 'Me eareha u utloa Lentsoe, u tseba moo u tsoang teng, u tsebile 'Nete. Uena haesale u le joalo, esale peō e ahile ka ho uena. Lentsoe le bone Lentsoe le neng le ahile ka ho uena, le neng le le teng pele ho motheo oa lefatše, ho bona Lentsoe 'me u tlide ho Lona.

<sup>49</sup> Joaloka pale ea ka ea tsuanyana ea ntsu, kamoo tsuanyana ea ntsu e qhotselitsoeng tlas'a sethole sa khoho. 'Me mothoana eo a inehanya le litsuanyana, eéna, sethole sa kakatletsa, 'me a

sa utloisise ho kakatletsa ha sona. 'Me—'me litsuanyana, lijo tsa tsona ka setšeng, e—e sa li utlosisise, kamoo li sebelitseng kateng. Empa ntho e ne e ahile ka ho eona, e bonahetseng e fapane le tsuanyana eo, hobane tšimolohong e ne e le ntsu. Ke hantle. Ka letsatsi le leng mama oa eona a fihla ho e tsoma, 'me, eitseha e utloa mohoo oo oa ntsu, o ne o fapane le ho kakatletsa ha sethole.

<sup>50</sup> 'Me ho joalo le ka molumeli e mong le e mong ea tsoetsoeng labobeli. U ka utloa thutamolimo eohle eo u e batlang, le likhanyetso tsohle tse entsoeng ke motho; empa ha Lentsoe leo le halima kantle mono, ntho e teng e itšoarellang, u tla ho Lōna. "Lōna le na beng le shoele sebeng (bophelo boo) O le tsositse joalo." Bophelo bo tsosetsoang teng bo tlameha ho ba teng mono, pele. Molimo, ka boitsebelopele ba Oona, o tsebile lintho tsohle. 'Me re ne re reroe ho beoa bara le barali ba Molimo. "Lōna le na beng le shoele sebeng le littolong, tseo bohle re na beng re tšoasitsoe ke tsona, empa O re tsositse joalo."

<sup>51</sup> Shebang Pauluse, mohlang oo Pauluse e le moithuti e moholo oa thutabomolimo. Empa mohla a kōpanang lifahleho li talimane le Lentsoe leo, Jesu, la tsosoa. A tsosetsoa Bophelong ka potlako ruri, hobane o ne a reroe ho ba seo. Eona... E ne e le karolo ea Lentsoe; 'me enereha Lentsoe le bona Lentsoe, e ne e le tlhaho ea hae. Ho kakatletsa ha lithole, likerekeng tsa molao, ha ho a mo hahlamela ka letho; o ne a bone Lentsoe. E ne e le karolo ea hae. E ne e le ntsu. E ne e se tsuanyana; a mpa a hlahletsoe feela setšeng le tsona. Empa e ne e le ntsu, le ho qaleng.

<sup>52</sup> Nkile ka utloa pale e maleba, ke a tšepa ha e utloahale e thunthetsa borapeli, ea letata le hlahelang tlas'a sethole sa khoho, ka mohla o mong. E sa utloisise. Mothaka ea tšobotsi e hlollang, thaka le mokhelo, le sa utloisise lerôle le ntho eohle. Li ne li bapala setšeng sa moliko. Empa ka letsatsi le leng sethole sa khale sa ntšetsa litsuanyana tsohle kantle ka morao ho moliko, eaba le habola monko oa metsi. Be, la tloseletsa la toba metsi ka lebelo la bokhoni ba lona. Hobaneng? Le ne le eso fihle pel'a letša pele. Le eso kene metsing pele. Empa e ne e le letata, le ho qaleng. Le ne le tlamehile feela ho ikhopola.

<sup>53</sup> Le molumeli o joalo. Ntho e lutse ho eéna, eona, mohla a teanang le Molimo lifahleho li talimane, o a ikhopola. Peō eo e lutse ho eéna, 'me e a tsosoa. Khele, ke hantle, 'me o fofa a tloha linthong tsa lefatše. O ichoella ho tsona. Khele, ha ke hopola, bohle re phetse bophelo ba rōna, mehleng e fetileng, linthong tseo tsa lefatše. Empa hang hoba re fumane Ntho ea makhonthe, ntho e ileng ea re tsosa, peōnyana e ileng ea fumana Bophelo, eaba lintho tsohle tsa lefatše li bolla hantle mono. Ha re a hlola re e lakalitse.

<sup>54</sup> "Ea tsoetsoeng ke Molimo, ha a etse sebe. Morapeli ea hlatsoitsoeng hang ha a sa na letsoalo la sebe, ha a sa na takatso

ea sebe." Potso ea sebe e phethiloe. U fetoha karolo ea Molimo, ka ho Kreste. Kreste o shoetse ho u lopolla.

<sup>55</sup> Joale nahanang sohle seo re ka beng re le sona holane e se be ka Molimo. Empa Molimo, mohaung oa Oona o enneng, kamoo O re lopolotseng bosiung bona! Re ka be re le kae bosiung bona hola e se be ka mohau oa Molimo o enneng holim'a rōna?

<sup>56</sup> Lefatše le kile la tlala sebe hakaale, motho a bolisa lefatše hakaale ebole pelō ea Molimo e ntšofatšoa ke hobane O bopile motho. Hlooho eohle ea tlala liso, 'mele ohle, 'me Molimo oa hlabeha ke hobane O bopile motho le ka mohla. Eaba O re, "Ke tla timetsa motho eo Ke 'mopileng." O tla ba timetsa ka ha a sa tšoara letho haese seshoba sa bobolu.

<sup>57</sup> 'Me morabe ohle oa motho o ka be o falalitsoe mohlang oo, empa Molimo, e leng morui oa mohau, oa se ke oa lumella ea seng molato ho timetsoa le ea molato. Eaba O tloha ho ea hlekela ba batlileng ho kena tsela, ba batlileng ho etsa ka ho lōka. Oona, oa hleka tsela ea mohau ho ba batlileng mohau, 'me Oa lōkisa areka. Ka mantsoe a mang, Oa melisa lintsu tsa Oona mapheo, li tle li fofe holim'a kahlolo, li se noeles le likhoho 'moho. Empa Oa—Oa hlophisa fera ea ho phonyoha, matsatsing a Nohe. Sena sa Mo qosa ho etsa hoo, ho e hlophisa, hobane O ne a ruile mohau.

<sup>58</sup> Empa hoba O hlahisetse batho tsela 'me ba e hana, joale, lebaka la bona ho e hana hobane ho se letho ka mono ho e amohela. Ha ho letho ho e amohela. 'Mé o ne a tloaetse ho re, "Ana u ka hlotla rapa mali, kanthebo rapa ha e na mali." Ha tšobotsi ea Bophelo e sa lula ka mono ho Bo amohela, le joalo Bo ke ke ba amoheloa.

<sup>59</sup> Lebaka leo Bafarisi ba talimileng Jesu sefahleho, le ho 'Mitsa, "Belsebule," hoba ho ne ho sa lula letho ka ho bona ho Mo amohela. "Empa bohole bao Ntate a 'Neileng bona," O boletse, "ba tla tla ho 'Na." E teng—e teng tsela eo e tlang ho hlahisoa ka eona.

<sup>60</sup> Ka linako tse ling u ka bua le batho seterateng, ho bua le bona ka Morena, ba u tšeja sefaflamahlo. Be, re tlamehile ho e phethisa, leha ho le joalo. Empa mamela, "Ha ho ea ka tlang ho 'Na a sa huloe ke Ntate oa Ka pele." Ke Molimo o tlamehang ho hula. Bophelo bo tlameha ho ba teng. "'Me bohole bao A 'Neileng bona, ba tla tla ho 'Na."

<sup>61</sup> Oa hlahisettsa ba batlang ho lopolloa khonahalo. O hlahiselitse ba batlang ho folisoa khonahalo. 'Me kahobane O entse sena, ho Mo etsa ea ruieng mohau, joalokaha esale O ruile mohau. Ke tšoanelo, ha u hana Sena, ha ho letho le setseng haese Kahlolo, hobane sebe se tlameha ho ahlololo.

<sup>62</sup> Faro, mohla a tsoetseng e—e leoatleng, joaloka moikaketsi, a hopotse ho kena joaloka Moshe. Moshe ka lebotho la hae, le Faro ka lebotho la hae, ba tlameha ba be ba timetse bobeli leoatleng, ka chebeho ea lintho. Empa Molimo, e leng morui oa mohau, oa

hlekela bana ba Baheberu fera ea ho phonyoha, (hobaneng?) ba ne ba latétsé tseleng ea kutlo, ba ne ba latétsé Lentsoeng.

<sup>63</sup> Joale mokhoa oa ho amohela mohau o mong feela, ke ho sala litaelo tseo Molimo o re fileng tsona. O ka bontša mohau ka mokhoa oo feela, ke ha re sala seo O se laetseng ho etsoa.

<sup>64</sup> Nakoana e fetileng ngangisanong, le moreri ea ntialehileng ke rera Thuto ea boapostola letsatsing lena. Ke a kholoa ke buile ka eona bosiu kapa a mabeli a fetileng, kapa nako e itseng, kamoo a itseng, “Ú ntse u leka ho sunya, mongoaheng ona, Thuto ea boapostola.” A re, “Mongoaha oa boapostola o khaolitse, le baapostola.”

’Me ka ’motsa, “Be, na u lumela Lentsoe?”

A re, “E.”

<sup>65</sup> Ka re, “Tšenolo 22:18 e re, hoo, ‘Ekareha e mong a tlosa Lentsoe ho Sena, kapa a Se ekeletsá,’ ha se mantsoe a mabeli feela; Lentsoe le le leng, ho tlosa Lentsoe le le leng.”

Ho re, “Ke lumela seo.”

<sup>66</sup> Ka re, “Nka u bolella moo mongoaha oa boapostola o abiloeng teng, Masého a boapostola a filoe Kereke; joale mpolelle moo Molimo o le hlothileng Kereke, ka Lentsoe. U ke ke oa khona; ha e fumanoe.” Ka re, “Joale hopola, hore Petrose, ka Letsatsi la Pentekosta, e ne e le—e le motumisi oa mongoaha oa boapostola. ’Me o ba laetse bohole joalo, ‘Bakang, le kolobeletsoe ka Lebitso la Jesu Kreste tšoareleng ea libe, le tla nka neo ea Moea o Halalelang. Hoba pallo ena e etselitsoe lōna, le bana ba lōna, le ba leng hole kaofela, bao Morena Molimo oa rōna a tlang ho ba bitsa.’”

<sup>67</sup> Joale ha u batla ho mamela ho kakatletsa ha sethole se itseng sa mokhatlo oa bolumeli, le ho phela motše mono linthong tsa lefatše, taba eo e supa phoso e leng teng. Hobane, Leo ke Lentsoe. “Ea ratang, a tle.” ’Me ha u rata, u tlameha ho tla. Empa ha u sa rate, u maemong a nyarosang. Empa ha u rata ho tla, tloo u sale moraloo oa Molimo morao!

<sup>68</sup> ’Me ha O ke o hlolleha ho phethisa seo O se tšepisitseng. Ke na be ke le mocha, joale ke holile, ha ke eso O bone o hlolleha Lentsoeng la Oona. Hobane, O ka etsa eng le eng haese ho hlolleha. O ke ke oa hlolleha. Molimo o ka sitoa. Hase ntho e ka etsoang ho Molimo ho hlolleha, oa ntoo itšalla e le Molimo. O tlamehile joalo, ho phethisa seo.

<sup>69</sup> Joale eaba lebotho la Faro le leka ho tšoantšisa, hobane ba ne ba sa bitsoa ’me ba sa rua Bophelo boo. Kahare ho . . . Pallo e ne e sa etsetsoa Faro. O ne a sa etsetsoa pallo ea lefatše la pallo.

<sup>70</sup> ’Me setšoantši, se lekang ho sala molumeli ea bilelitsoeng tse joalo, o e fetola sesomo feela. Ke bona bothata ba tsamaiso ea borapeli ba rōna kajeno, ke batho ba bangata haholo ba lekang ho tšoantšisa Moea o Halalelang, batho ba bangata haholo ba

leka ho tšoantsisa kolobetso, batho ba bangata haholo ba leka ho tšoantsisa mongoaha oa boapostola. O baletsoe balumeli, bona ba inotši. Molimo o betlile tsela, ka mohau o enneng, hore bana ba Oona ba se ke ba timela. O ba etselitse tsela.

<sup>71</sup> Joale, Faro o ntse a leka ho phallela, o noetse hona metsing a pholositseng Moshe le seholpha sa hae. Joale, Moshe ha a ka a noela, hobane Molimo ke morui oa mohau ho ba setseng tsela ea Oona e betliloeng morao. Amen.

<sup>72</sup> Na le bona seo ke se bolelang? Seo, bosiusing bona, batho ba sa lumeleng pholiso ea Khalalelo, batho ba sa lumeleng kolobetso ea Moea o Halalelang, ebe ba ka fumana letho joang? Molimo ke morui oa mohau ho ba O salang morao; e seng tumeloana, empa ho sala Molimo morao.

<sup>73</sup> Molimo ke Lentsoe, 'me Le ne le etsoe nama la aha har'a rōna, joale, e le hore O tle o pepese limelo tse ling tsa Molimo. 'Mele, Jesu, e ne e le 'mele oa Molimo, tholoana. Moshe o 'Mone a feta, mokokotlo oa Oona; ha ho mang ea kileng a bona sefahleho sa Oona. Empa joale re O bone, re O bohile, ho O bona joaloka Sehlabelo. Joale, le a bona, E ne e le tholoana ea Molimo, e pepesitsoeng, Lentsoe. Ke seo A neng a le sona.

<sup>74</sup> 'Me ha molumeli ofe a tla ho Molimo, o fetoha tholoana ea Molimo ea Lentsoe la Oona, o sebelisetsoa ho bonahatsa Lentsoe le baletsoeng letsatsi leo. Le a bona? Ke hantle. Molimo, e leng morui oa mohau, ha o eso re tlohele re se na paki. Ke morui oa mohau.

<sup>75</sup> Re fihlela Molimo o hauhetse Moshe hakaale kantle mono leoatleng leo le shoeleng, kantle Leoatleng le Lefubelu mane, ke rialo. Mohla O boletseng mono, ho Exoda 19:4, Oa re, "Ke le pepile ka mapheo a ntsu, ka le tlisa ho 'Na. Ho ba pepa ka mapheo a ntsu, ka le tlisa ho 'Na!" Banna ba bang har'a leoatle leo kantle mane, le hona, ba kile ba leka ho tšoantsisa. Empa eng? "O ile oa ba pepa ka mapheo a ntsu."

<sup>76</sup> Joale kamehla Molimo o bapisa baporofeta ba Oona le lintsu. 'Me e ne e le eng? Moshe e ne e le moromuo oa Oona. 'Me ba ne ba latétse Moshe, 'me e le ona mapheo a ntsu a ba pepileng, hobane o ne a kakatletse molaetsa oa Molimo. 'Me batho ba o sala morao. Ba ne ba setse Molimo morao ha ba setse Moshe morao ka molaetsa oa Hae oa tokoloho. 'Me Bibele e boletse, "Ééna, ha ba ka ba timela 'moho le ba sa kang ba lumela." Hoba, Molimo oa rua mohau ho bona, kahobane ba kile ba latéla melao ea Oona. Molimo o batla re sale melao ea Oona morao.

<sup>77</sup> Re ka bua joalo ka Kore le Dathane le sekhakhatha sa bona sa batho ba sa lumeleng, joalokaha ba lekile ho tšoantsisa. Ba lekile ho sunya lethoana lenaneong la Molimo. Ba ne ba sa khahlisoe ke lenaneo la monna a le mong. Ha le a ba khahlisa. Ba tlameha ho etsa lethoana. Kore o itse, "Khele, ho na le banna ba halalelang ho feta uena, Moshe. U etsa ekare ke uena feela

lebopo le holim'a... kapa naleli e pel'a khoeli e le esi, ke rialo." Le ho re, "Ke—ke... ha u a tšoanelo ho etsa joalo. 'Me banna ba bangata mona."

<sup>78</sup> Athé Moshe o tsebile a tlameha ho pepa bana bao ho ba kenya lefatšeng la pallo, hobane pallo e ne e etselitsoe eéna. 'Me o tšoanelo ho ba jara a ba isa lefatšeng la pallo.

<sup>79</sup> 'Me, kajeno, Moea o Halalelang o teng mona ho nétefatsa Lentsoe la Molimo, 'me ke lona lepheo la ntsu leo re tlamehang ho le kalla; e seng thutabomolimo e itseng e betliloeng ke motho. Empa re tlameha ho pepa holim'a lepheo la ntsu, ho ea Lefatšeng la pallo.

<sup>80</sup> 'Me mona ba ne ba tla ntša seholpha sa likhoho mono, Kore a nahana, le a tseba, ho qatsoha, a tšoantsisa sena, ntsu. 'Me hoba ba etse joalo, Molimo oa re, "Ikhethe ho bona," eaba O metsa lefatše. O ka be o metsitse ntho eohle, tlholeho eohle, empa Molimo e ne e le morui oa mohau ho ba lekang ho sala Lentsoe la Oona morao. Kamehla, Molimo e leng morui oa mohau. Ba bangata ba ile ba ema le Moshe, eaba Molimo o ahlamisa lefatše oa metsa mosalumele. Eéna, e—e mosalumele, kamehla o tla timela.

<sup>81</sup> Bao ba sa kang ba lumela, leha ba tsoile ba hata nakoana, empa, bao, Jesu o itse, "Bao, e mong le e mong, o shoele." Ho *shoa* ke "timeletso." Ba shoele. Nahanang ka bona feela. Ba tsoile, ba bone mehlolo ea Molimo, ba bone letsoho le leholo la Molimo, ba thabela manna; eaba ba tsoela koo ba mamela monna ea bitsoang Baalame, ea khopamisitseng tsela ea Molimo, ka ho ruta khahlano le Lentsoe, "Bohle re baena, a re teaneng bohle 'moho ke hona."

<sup>82</sup> Ho tsoha tsamaiso e 'ngoe ea Baalame, kajeno, "Ha re teaneng bohle 'moho." E ke ke ea sebetsa. Ha re hoanteng le Ntsu, Jehova Ntsu. Lōna le litsuanyana tsa ntsu.

<sup>83</sup> Ho bolokehile ba bararō feela seholpheng sohle; Moshe, Kalebe, le Joshua. Ba bang bohle ba timetse felleng; Jesu o itsalo, ho Santa Johanne khaolo ea 6. Molimo, ka mohau, ha o a ba lumella ho timela, hobane, 'moho le ba sa lumeleng. Ba shoele bohle hantle mono felleng, 'me ba shoele. Molimo oa pholosa Moshe le balumeli ba lintsu, kahobane ba hlomphile Lentsoe la Oona.

<sup>84</sup> 'Me kajeno, motsoalle, mokhoa o le mong ho rekoloheloa ke Molimo le ka mohla; Molimo ke morui oa mohau, kajeno, empa re tlameha ho hlompha seo O se buileng ka eona. U ke ke oa nka feela seo motho mang a se buang. U tlameha ho nka seo Molimo o se boletseng. O itse, "Lentsoe la motho ke leshan, la Ka ke 'neta."

<sup>85</sup> Kajeno re a bolelloa, "Sohle seo u tlamehang ho se etsa," litulong tse ngata, "ke ho ingolisa kerekeng, ho boloka tumeloana, kapa ntho e kang eo; kapa ho etsa thapelo, kapa ho

beha lebitso la hao bukeng, kapa ho fafatsoa kapa ho kolobetsoa ka tsela e itseng, kapa ntho e kang eo. Ke phetho seo u tlamehang ho se etsa.” Empa ke phoso.

<sup>86</sup> Ho ba ntsu ea Molimo, u tšoanelia ho sala Lentsoe morao, letsatsi le letsatsi. U tlameha ho tsoelapele, ho iphepa ka Lentsoe.

<sup>87</sup> Joale re ba fumana, kamorao ho nako ena, ho luma-luma hape, khaello ea tumelo, hoba Molimo a ba bontše mohau. ’Me re ba fihlela ba luma-luma khahlano le Molimo, ’me, hoba ba etse, ba bolaoa ke ho longoa ke linōha. Be, e ne e ba lōketse. Ehlide bo. Motho ea etsang phoso ka Lentsoe la Molimo a etsa lintho tsena tseo ba li entseng, ba lōkeloa ke ho shoa. E mong le e mong oa bona o a lakatsa, ba ne ba lōkeloa ke ho shoella felleng.

<sup>88</sup> Empa mohla ba kutseng hakaale hoo esita le ngaka Moshe le mang oa bona a sitiloeng ho etsa letho ka eona, ’me ba shoa ka likete; empa Molimo, morui oa mohau, Oa etsetsa ba neng ba tla lumela ho Eéna tsela ea ho phonyoha. Oa hlophisa sehlare sa eona, ka ho emisa nōha ea borase. Molimo boruing ba Oona.... Molimo oa etsa tsela ea ho phonyoha bana ba Oona ba lumelang ba tle ba folisoe.

<sup>89</sup> Molimo o thahasella sohle se phoso, sohle seo u se hahamallang. Khato eohle ea bophelo, Molimo o a u thahasella. U ngoana oa Oona, ’me Ke morui oa mohau. O batla ho u sebeletsa eona.

<sup>90</sup> Batho bao ba entse sebe hamorao, ka ho tšoara seo Molimo o ba etselitseng pheko ka sona, nōha ea borase, se emetse sebe se seng se ahlotsoe, ’me ba fetotse neo eo molimo oa bohata. ’Me ba boela ba etsa sebe. “Molimo o ke ke oa arolelana khanya ea Oona le motho.” Ka baka leo, re ke ke ra ba le melimo e mebeli, e merarō, e mene. Molimo o mong feela. O ke ke oa arolelana khanya ea Oona le letho lesele. Ke Molimo, o inotši, le a bona; joaloka bahetene ba melimo e sehlopha. Molimo oa rōna o mong feela, ’me O ke ke oa arolelana khanya ea Oona le e mong, le joalo O ke ke oa lumella seseto sa letho ka pel’ a Oona. Leha koana O etselitse batho pheko, ’me e ne e le Lentsoe la Molimo, e ne e lōkile; empa mohla ba qalang ba e fetola molingoana, ba kena khathatsong.

<sup>91</sup> Joale e itšoanelia hantle feela, ha ke nahana, e hlahetse mengoaha ea rōna ea kereke. Molimo o re romeletse molaetsa oa Martin Luther ka molaetsa oa hae, John Wesley, molaetsa oa pentekosta, empa ra etsang ka eona? Seo ba se entseng ka nōha ea borase, re e fetotse molimo oa bohata, “Ke setho sa sena, ’me ke setho sa sane.” Le a bona, u setho sa ntho e se nang botšepehi bo loheletsoeng le borapeli ba makhonthe bo halalelang ba Lentsoe.

<sup>92</sup> Ho etsahetseng? Bibele, re bolelloa ka Bibeleng, ho thoe, “Moporofeta o nkile seseto seo ’me a se senya.” Alleluia!

<sup>93</sup> Seo re se hlokang temeng kajeno ke moporofeta ea tlang ho falatsa seseto sa mekha ea malumeli, bona ba hopolang ba ea Leholimōng ka ho ba setho sa tumeloana kapa mokha oa bolumeli; e hloka ho falatsoa le ho chesoa, ho lahloa. Molimo o tletse mohau. Ke morui oa mohau. Letsatsing leo bohole re ka beng re hohlometse bohole tšenyehong ea lefifi kantle mane, empa Molimo, morui oa mohau, o re romeletse Moea o Halalelang oa mannete oa makhonthe, ka botoloki ba Oona ka Sebele ba Lona, hantle ka mohahong ka mona bosiu bo bong le bo bong. Molimo, e leng morui oa mohau oa Oona, re Mo fihlela a babatseha hakakang! E, monghali.

<sup>94</sup> Joale sohle seo ba nahanneng ba ka se etsa e le ho ea ho nōha ena feela, kapa nthoana ena eo Molimo o e entseng kantle mane, o laetseng Moshe ho e etsa le ho e feha thupeng, 'me ba ka folisoa ba sa tsepahale ka letho. Ba ema feela 'me ba e talima. 'Me ba qala ba e fetola molingoana, 'me Molimo oa romela moporofeta ho e senya.

<sup>95</sup> Joale, bohole ba hanneng ho talima nōha eo felleng, ba timetse. Joale Molimo o etsa tsela, empa ha u hana ho e talima, ha u ka lula ka nqane ho seterata, haeba u itšoareletse ka tumeloana ea mofuta 'me u hana ho talima Lentsoe ka kotloloho le ho bona haeba haeba Le lōkile kapa che; bohole ba hanneng ho talima, ba timetse. 'Me Molimo ke Molimo o sa fetoheng le ka mohla. 'Me bohole ba hanneng ho talima, ba timetse. Ho joalo kajeno, ho a tšoana.

<sup>96</sup> Eaba batho ba etsa sebe hamorao, 'me joalokaha ba entse kamehla, ba etsa seseto ka-ka eona, ho e etsa e-e-e... ho fumana, ho leka ho folisoa ho se botšepehi, 'me bona "e ne e le litho tsa ho hong," le kamoo re sebetsang kajeno. 'Me joale re a ba bona, phapang ea eona, e le, hore Molimo . . .

<sup>97</sup> E ne e le pheko e lōkileng le pontšo e lōkileng ea nako eo. Ka nako eo, e ne e itōketse. Empa e ne e etselitsoe nako eo feela, bakeng sa leeto leo. E tla sebeletsa hoo hohle, leetong *leo*.

<sup>98</sup> 'Me molaetsa o tlisisoeng ke Martin Luther, oa tokafatso, o ne o lōketse mongoaha oa Luther ka bottlalo. O tsamaile hakaalo feela.

<sup>99</sup> Khalaletso e ne e lōkile mongoaheng oa Wesley. O tsamaile hakaalo feela.

<sup>100</sup> Re ntso kena mongoaheng oa pentekosta. 'Me khutlisetso ea lineo ke ntho e khabane haholo, e ne e le khabane mongoaheng, empa hona joale re fetela ka nqane. Re ka nqane, ruri joalokaha lefatše le le teng. Re tlameha ho tšeleta ka nqane ho ntho ena, hobane re entse hantle seo ba se entseng ka eona pele, ho bopa seseto ka eona. "Ke setho sa hlophiso *ena*, ke setho sa hlophiso *eo*."

<sup>101</sup> Molimo o tla romela motho ea tlang ho e pshatla a e silakanye likotoana, le ho thasisetsa Lentsoe la Oona, Lentsoe le tletseng.

Lemohang. Ho bokoe Molimo! Joale re bona seo e le 'nete. Molimo, morui mohaung oa Oona!

<sup>102</sup> Hoba moporofeta a senye sena, e ba siile ba sa tšoara letšoao la pholiso, la pheko, hobane seseto sa bona se sentsoe. Empa Molimo, morui oa mohau, oa ba etsetsa e 'ngoe. 'Me Oa nt oo etsang, seo? Oa fuluha metsi letšeng tempeleng, ba bangata ba tlie ba folisoa, ka ho lukela metsing ana. Jesu o theohetse letšeng lona lena, o bone monna ea robetseng mono lilemo tse ngata, ho emela phuluho ea metsi. Le a bona Molimo, morui oa mohau! Leha koana ba e fetotse seseto, leha moporofeta a ile a tšoanel a ho e pshatla, Molimo oa ba etsetsa tsela e 'ngoe, hobane Ke morui oa mohau. O batla ba folisoe, 'me O entse tsela ea pholiso ea bona.

<sup>103</sup> Joale, ea tsoelapele, lefatše la eketsa sebe le ho eketsa sebe, ka linako tsohle. 'Me qetellong lefatše la silafatsoa ke sebe hakana Molimo o ka be o le timelitse, O boletse ho Malakia 4, "esere Ka timeletsa lefatše ka thohako." O ka be o entse hoo; potso feela.

<sup>104</sup> Empa eaba Molimo, morui oa mohau, O rometse Mopholosi, Jesu Kreste. O rometse Jesu ho behoa Mopholosi le mofolisi. Hoba O boletse, "Joaloka Moshe a fehile nōha ea borase felleng, le Mora motho eka khona a phahamisoe," ka morero o tšoanang. Eéna, pheko, ke sona seo re ka se tsekang, le letho haese pheko. Seo Jesu a se lefeletseng ka Mali a Hae, ke sona seo re se tsekang. 'Me Bibele e boletse, "Athe O hlabetsoe littolo tsa rōna, A tetekoa ka baka la bokhopo ba rōna, kotlo e re tlisetsang khotso e Mo oetse holimō; 'me re folisitsoe ka maqeba a Hae." Ke sona seo re ka se tsekang, hobane e le sona seo pheko, eo re e emetseng, re e batletsoeng. Molimo, morui oa mohau!

<sup>105</sup> Ena e ne e tla ba pheko ea Bosafeleng, hobane O tlie ka Sebele. Molimo o tlie ka Sebele, ka sebopoho sa nama ea sebe, ho etsa e—e—e—pheko ea Bosafeleng; le ho utloa bohloko nameng, le ho etsoa pheko; le ho khutla ka sebopoho sa Moea o Halalelang, ho thasisetsa pheko eo. Moo ho seng nōha ea borase kapa ho seng metsi a fuluhuoeng ho e phethisa, ntho eohle e supile Pheko e phethehileng eo. Molimo, mohaung oa Oona o enneng, o no o entse sena.

<sup>106</sup> Joale, kajeno, ka ho phela letsatsing lena la rōna, re haotse mengoaha ena ea kereke ra hhalosetsa ntho Eo hole. Baithuti ba rōna ba thutabomolimo ba letsatsi ba lahlehetsoe ke lehlakore la Lona hole. Ba Le hhalosetsa hole, ho fetisetsoa letsatsing le leng, mongoaheng o mong o itseng, ntho e 'ngoe e itseng, morao koana, ho tsoa khale morao koana. 'Me pholiso ea Khalalelo e ne e batla e qetile sebaka sa eona, e batla e sa lumeloe ke motho. Ba ne ba e soma. Lilemong tse batlang li sa fete tse mashome a mabeli tse fetileng, ba ne ba e soma. Ho bua 'nete Mapentekosta a batla a e hlobohile. Ba qalile mesong ea matsatsi, ba mpa ba e hlobohile.

<sup>107</sup> Le shebe kamoo ba sebelitseng. Joale ba hlahafalitsoe ke mokha oa bolumeli, ba matha ho bopela e mong le e mong oa bona tumeloana, le joalo. Ntle le hoo, sebakeng sa ho amohela Leseli, kamoo Leseli le kenang kateng; ba hlophisitse ba ipetlela litumeloana, e mong le e mong a fihla, ho ipetlela thuto le ho tsitlallela thuto eo. Ba ntoo fokotsa hakaale hofihlela Moea o Halalelang o sitiloe ho kena kerekeng. Ba fetoha seseto se seng joaloka nōha ea borase, ea fetoha e—e molimo oa seseto. E mong le e mong o itse, “Ke setho sa *sena*, ‘me ke setho sa *sane*.” E ne e le ho sebeletsa molimo oa seseto. Re ne re kene tšileng e kae, nakong ea qetelo.

<sup>108</sup> Empa Molimo, morui oa mohau oa Oona, o khutliselitse Moea o Halalelang holim'a rōna, le ho nétefatsa Lentsoe la Oona bosiung bona joalokaha O tšepisitse O tla etsa. Molimo o tšepisitse O tla etsa lintho tsena. Shebang seo O se entseng!

<sup>109</sup> Shebang seo O se entseng, kamoo joale re ka bonang kamoo O tšepisitse mongoaha o mong le o mong ntho e itseng e tlang ho etsahala. 'Me re e fumana e hlahile hantle joaloka eona, seo O boletseng O tla se etsa, hobane Ke morui oa mohau oa Oona, kamehla ho rua mohau ho phethisa Lentsoe le leng le le leng leo O le tšepisitseng. O tlameha ho e phethisa, le kamehla, hore a lule e le Molimo. Kamehla O etsa sena, Lentsoe la Oona kamehla le phetheha sehleng sa Lona. Peō ea Oona eo O e jetseng lefatšeng. O entse'ng? O e behile mona Lentsoeng, 'me ke peō. 'Me nako le nako ha mongoaha o fihla, peō eo e a butsoa, 'me hlabollo e a fihla. 'Me O e tšepisitse, 'me e etsa hona hoo.

<sup>110</sup> Joale re ne re sa lōkeloe ke lintho tsena. Re ne re sa lōkeloe ke mahlohonolo ana a Molimo, hoba re kile ra sala lintho tsa lefatše morao, ho tsamaea ka phoso ea Kaine. Kaine, ea hahang aletare e ntle le kereke e ntle, le ho hloma lipalesa holim'a eona, 'me a e hopola e le eona ka tšoanelo, “E ne e le lesihla la liapole kapa lipere, kapa ligaranate, kapa e ka bang eng,” tseo ntatae le 'mē ba li jeleng tšimong ea Edene, tse ba lelekileng tsa ba ntša. 'Me a ntoo boela a e nyehela Molimo, 'me Molimo oa e latola.

<sup>111</sup> “Empa Abele ka tumelo o nyehetse Molimo sehlabelo se molemo ho feta sa Kaine.”

<sup>112</sup> 'Me, kajeno, Bibele e boletse ho Juda, ho thoe, “Ba mathile ka tsela ea Kaine; ba timetse ka khanyetso ea Kore.” Le a bona, “ba mathile ka tsela ea Kaine,” ho haha lialetare, ho haha likereke, mekha ea bolumeli, ho e khabisa lipalesa, ntho e khōlō, litho tse fetang tsa bang bohole; ho amohela lintho, ntho efe e fihlang le e qhomelang holimo-le-tlase, kapa ho tsukutla matsoho, kapa e kolobelitsoe ka tsela e itseng, kapa e buile ka lipuo, kapa e mathile fulurung, ba beha mabitso a bona bukeng. Ke hantle. Le ho hlano hela 'Nete ea sebele e reroang, le ho Le latōla. Ho ka ba joalo joang? Lemohang litšila tseo re neng re kene ho tsona! Lemohang.

<sup>113</sup> 'Me Bibele e boletse, "'Me ba nkile tsela ea Baalame, 'me ba timetse ka khanyetso ea Kore." Ho timela ka khanyetso! Khanyetso ea Kore e ne e le efe? "Khele, u ikhopola e le uena feela monna ea halalelang? Khele, ea Molimo... Bohle re a halalela. Kereke eohle e itōketse. Sohle... Kaofela ha rōna 'moho, ke seo re tlamehang ho se etsa." Ke hona moo ba timetseng, seo. 'Me e re lōketse kannete. Re lōketse ho ba seo.

<sup>114</sup> Empa Molimo, morui oa mohau, o re hutse tšenyehong oa re lumella ho e bona le pele e fihla mona. Morui mohaung oa Oona, le ho re khutlisetsa tsoseletso ea pholiso ea Khalalelo, le ho khutla ha Matla a Molimo hape. Ho latéla nalane, ha ho tsoseletso e tlotseng lilemo tse tharō. Tsoseletso ena e hutse lilemo tse leshome le metso e mehlano, esale mello e tuka, ho pota le ho pota lefatše. Khele, hobane re ne re lōketsoe ke hona? Molimo, morui oa mohau oa Oona, e seng hobane re e lakalitse kapa hobane e ne e re lōketse, ke rialo. Le nahane feela seo e se entseng!

<sup>115</sup> Ke nahana e mong oa bokhaitseli hantle mona Phoenix, eo bongata ba lōna le mo tsebang, Mof. Hattie Waldrop, o ne a tšoeroe ke mofetše oa pelō. Eaba o kena moleng oa thapelo holimō mona mohla Moena Moore le 'na re fihlang koano khetlo la pele, lilemo tse ka bang leshome le metso e mehlano, tse leshome le metso e robeli tse fetileng. 'Me o ne a bolaoa, a tšoeroe ke mofetše oa pelō, o tlamehile a be a shoele khale koana. Empa Molimo, morui oa mohau, oa romela Matla a Oona holim'a hae. 'Me Oa pholosa bophelo ba hae, 'me o a phela kajeno. Molimo morui oa mohau!

<sup>116</sup> Mokonkrese Upshaw, monna ea phahameng. Ke a kholoa e ne e le mopresidente, kapa se seng, ea e—ea Baptise, Southern Baptist Convention, ka mohla o mong, kapa motlatso-presidente kapa se seng. O entse tsohle. E ne e le monna ea lōkileng. O entse tsohle kamoo a tsebileng. A bonane le ngaka e 'ngoe le e 'ngoe. Ha a thusoa ke motho ka letho. A tlanngoe. Bareri ba mo rapeletse. A tšetsoe galone ea oli hloohong, tlolo, ea bareri ba fapaneng hohle.

<sup>117</sup> Bosiu bo bong, Los Angeles, California, ho nyolohela sefaleng, ha ke sheba sehlopha sa litulo tsa bakuli tse batlang li feta ka makhetlo a mabeli, a mararō, ba lutseng mono, hohle holimō-le-tlase lipakeng tsa litulo, morao le pele. 'Me ka mane ho robetse moalong ngoanana oa 'mala, ngoanana oa Monegro, 'mé oa hae—oa hae a lutse pel'a hae. 'Me moena oa ka a ntse a nyolla mola oa thapelo.

<sup>118</sup> 'Me eaba ke shebile, ke sa tsebe se etsahalang. 'Me ka bona ngaka, e roetseng ligalase tsa khetla-khulu, e oporeita ngoanana oa monegro, bakeng sa maemo a 'metso, 'me a shoele litho. 'Me ka qamaka, ka nahana, "Ebe ngoana eo o kae?" Eaba ha ke 'mone.

<sup>119</sup> Ka morao ho nakoana, tlase koana, kantle ho tšepo, e le ngoanana e motle oa lilemo li batlile ho ba supa kapa robeli, a tla shoa litho bophelo bohle ba hae. 'Me 'mé oa hae a lutse tlase mono le eéna a khumame, a rapela. Eaba ke re, "Ngaka ena e oporeitile ngoanana oa hao e monyenyan," le ho e hlalosa.

A re, "Ke 'nete, monghali."

<sup>120</sup> Eaba o leka ho isa lesea kalaneng. Ba 'molella ho se etse joalo. Ba leka ho mo kokobetsa. Nakong eo ba batlang ba mo kokobelitse, ka nahana, "Be, re tla fumana monyetla ho mo rapella." Metsotsong e 'maloa... Mona ho ka ba le batho hantle ba neng ba le teng mono bosiung boo.

<sup>121</sup> 'Me eaba ke shebile holim'a letšoele, ka bona ngoanana eo a theoha, eka e—e tselana e tšesane, a tšoere popi liphakeng tsa hae, a koietsa popi eo. Ho sa tsotellehe ngaka e boletse hakakang a tla shoa litho bophelo bohle ba hae; Molimo, morui oa mohau, oa romela oa theola Moea o Halalelang, ka pono, 'me ngoanana eo a tsoa mono, 'me eéna le 'mé oa hae ba tšoarana ka matsoho ba tloha ba theoha ka mola oa litulo, ba rorisa Molimo.

<sup>122</sup> Motše koana ho lutse monna leqheku, Mokonkrese Upshaw, bongata ba löna le tseba bopaki ba hae. Ebile monna ea lökileng, a lekile bophelo bohle ba hae, lilemo tse mashome a tšeletseng le metso e tšeletseng e le seqhoala sa setulo sa bakuli, a sumutsoa ka moalo; melangoana tlas'a liphaka tsa hae, a ikokotlela ka eona, a ke ke a tsamaea ka tloaelo le ka mohla hape. 'Me eaba o lutse mono, ho sheba seo. 'Me hang feela, ka talima ka bona pono. Ke enoa a etla, a parola holim'a letšoele, a inamisa hlooho ea hae, a tsamaea joaloka motho mang. Ke ne ke sa tsebe monna eo.

<sup>123</sup> Ka re, "Morao mono ho lutse monna ea phahameng. O oetse koloeaneng esale moshanyana, holim'a moralo oa furu, a lemala mokokotlo. Ba phuntse masoba fulurung, ho thibela ho reketla, ha batho ba tsamaea, ho se thonkhe mokokotlo oa hae." Ka re, "O fetohile monna ea phahameng, 'me ha a phetse ho phahama. O lutse selikeng se seholo mane White House."

<sup>124</sup> 'Me monna enoa a fihla a mpolella, ho re, "Eo ke Mokonkrese Upshaw. Na u kile oa utloa ka eéna?"

Ka re, "Ha ke eso utloele ka eéna."

<sup>125</sup> 'Me a aromela maekrofounu o atolositsoeng morao mono ba ntse ba qoqa, morao le pele.

<sup>126</sup> Eaba ke qala ke qamaka, 'me ka bona ho tla Mokonkrese oa leqheku, a etla a ntobile, ponong, a le setloaeling ka phetheho eo a ka e khonang. Molimo, e leng morui oa mohau, oa mo hula setulong seo sa bakuli, 'me o tsamaile a sa sebelise melangoana ho fihlela letsatsi la ho shoa ha hae. Molimo e leng morui oa mohau! Athe lingaka li hlolehile, athe mahlale a hlolehile, athe sohle se hlolehile, Molimo ea eba morui oa mohau ho Mokonkrese Upshaw.

<sup>127</sup> Ke nahana ka 'na. Ke sa le moshanyana, ke hopola joaloka... Batho ba mpitsa kajeno, "mohloea-mosali." Lebaka la eona, ke bone boitšoaro bo nyehlileng hakana ba basali bongoaneng ba ka. Ka ba hloea ke hona. 'Me hona joale ha ke etse joalo, ka ha ke tseba ba bang ba lōkileng. Empa ke hopola bobe ba eona, boitšoaro bo nyehlileng hakana. 'Me ka nahana, "Khele, ha ke—ha ke batle ho teeloa hare ke batho. Ha ke na thuto, nke ke ka batla efe."

<sup>128</sup> 'Me nccheme oa khale a lutse mono, a sa apara le hempe, baki ea ka e qhoaelsoe holimō ka mokhoa *ona*, ka lemao la polokeho, 'me ho chesa haholo. 'Me mosuoe a re, "William, ha u chese ha u apere baki eo?"

<sup>129</sup> Ka re, "Che, mofuma'li, ke batla ke hatsetse." 'Me a nkatumetsa pel'a setofo a lahlela patsi setofong, 'me ka batla ke tuka. 'Me ka—ka hloka hempe sehla seo sohle.

<sup>130</sup> 'Me ka nahana, "Ha nka fumana chelete le ka mohla, ka fumana lethoana khetlo le leng, ka itholla sethunya sa moetso oa mashome a mararō-mashome a mararō," ke tla fallela Bophirima mona ke phele kantle mona ke tsome, bophelo ba ka bohle. Ke sa batle ho amana le batho ka letho. Ho koekoetla feela, hobane ba ne ba sa nthate, 'me—'me ke tla ba koekoetla feela.

<sup>131</sup> Nako le nako ha ke theohela motseng, ho qoqa le motho, ho bona batho seterateng, bao ke ba tsebang. Ke re, "Lumela mono, John, Jim! U phela joang?"

"Oh, lumela."

<sup>132</sup> Le a bona, ba sa batle ho buisana le 'na, ba sa batle ho amana le 'na ka letho, hobane ntate oa ka le bao ba ne ba rathola wiski. 'Me e se 'na—e se 'na ea etsang seo. E se letho leo ke le entseng. 'Me nkabe ke fetohile mofuta oo.

<sup>133</sup> Empa joale ke boleletse mohatsa ka, nakoana e fetileng, "Lebota la ka le shatamane lithunya tse khabane tse ka rekoang." Oh, ke sa hopola liaparo tseo tsa khale tse litšila. Bosiung bona ke tšoere lisutu tse peli kapa tse tharō tse ntle. 'Me ha ho metsoalle? Ke tlameha ho ipata kantle felleng, ho phoka batho. Molato ke'ng, na ke ka lebaka la botho ba ka, na ke ka lebaka la thuto ea ka? Che. Molimo, e leng morui oa mohau, o mpone maemong ao Oa mpholosa.

<sup>134</sup> Ke sa hopola ke tataisoa ka liphaka, ke le sefolu sa monna. Ke sa bone. Sohle se rothofetse ka pel'a ka; nka be ke foufetse bophelo bohle ba ka. Empa Molimo, e leng morui oa mohau, oa busetsa pono ea ka. Ke lilemo li mashome a mahlano, pono ea ka esale ntle. Molimo, morui oa mohau, ke phetho seo nka se buang.

<sup>135</sup> Khetlo le leng kereke e ne e sa hlophisetsoa mokhoa oa pholiso. Ba ne ba e filoe, feela ba e hanne. Empa Molimo, morui oa mohau, oa ba romella neo ea pholiso ea Khalalelo. Oo ke Moea

o Halalelang har'a rōna, o thasisetsang Lentsoe ka lipontšo tse latétseng. Molimo e leng morui oa mohau!

<sup>136</sup> Mona ke tšoere maqephe a mabeli kapa a mararō a linoutšu, empa ha ke leke ho li finyella, kaha ke—ke bona nako ea ho qala mola oa thapelo e batla e tšoere. Empa Molimo e leng morui oa mohau oa Oona!

<sup>137</sup> Bongata ba lōna mona bosiung bona, le latioletsoe ke lingaka. Batho ba teng ba lutse litulong tseo tsa bakuli, mohlomong ha ba sa tla tsoa ho tsona le ka mohla. Ba tla itulela mono. Ba bang ba bona, ba shoele litho ka mekhoa e fapaneng, bona (lekhale) ha ba sa tla tsoa, ha ho kamoo ba ka tsoang kateng. Empa Molimo, mohaung oa Oona o ruileng, o hlahisitse pheko. Le se ke la e hana. E amoheleng. Ba teng banna ba tšoeroeng ke pelō kantle mane, batho ba mefetše, lingaka li sitoa ho etsa letho ka eona. Le feletsoe ke tšepo, le feletsoe ke thuso, lefatšeng lena.

<sup>138</sup> Empa Molimo, mohaung oa Oona o ruileng, o theotse Moea o Halalelang, 'me o mona hantle joale ho thasisetsa Lentsoe, ho paka E le oa maobane, kajeno, le kamehla. Hobane e re tšoanetse? Hobane Molimo mohaung oa Oona o ruileng! Amen. Joale ke eéna Eo, ke Mothro eo, Ke Morena Jesu eo. Ha A shoa, empa O tsohile bafung, 'me O phela kamehla eohle.

<sup>139</sup> Esale Oona maobane, kajeno, le kamehla, esale morui oa mohu oa Oona joalokaha O entse ho mosali oa phallo ea mali. 'Me a pholletsa letšoelle. A feletsoe ke litšepo, lingaka li sebelitse ka sohle. A tšoeroe ke phallo ea mali. A shoa. 'Me a ama seaparo sa Mong'a hae. Molimo, morui oa mohau, oa retoloha oa 'molella maemo a hae. 'Me a folisoa phallo ena ea mali.

<sup>140</sup> Mothroana, seotsoa se nyehlileng se nyolohetse selibeng letsatsi le leng, ho kha metsana. Ha ho tšepo. A khaotsoe har'a baroetsana, ho batho, bophelo ba hae bo sa lōka. 'Me a nahana, "Ho leka ho thusa'ng? Ke lahlue, ha ke a salloa ke letho." Empa a talima, ho emeng kathoko, kapa ho lutseng pel'a seliba, 'me mono ho lutse Monna Ea 'moleletseng lintho tsohle tseo a li entseng, Molimo o ruileng mohaung oa Oona.

<sup>141</sup> Oona Molimo oo, bosiung bona, ke morui mohaung oa Oona hakaalo, 'me O sa tsoana feela le matsatsing ao. Molimo e leng morui. [Sekheo lebanteng—Mohl.]

<sup>142</sup> Ke a kholoa re tšoere litlankana tsa thapelo tse makholo a mabeli kantle mona, kapa seo re se bitsitseng ho tsoa makholong a mabeli. Re tla li bitsa re emise batho mola. Re tla ba rapella.

<sup>143</sup> Empa pele re etsa hoo, batho ba tileng bocha mona, ho siroha litumelokhoela tsohle. Ena ha se tumelokhoela. Ke ponahatso ea tšepiso ea Molimo. E itšetlehile ka seo u se shebileng. Ha ho motho ea nang le matla. Ha ho motho ea matla. Empa joaloka balumeli re ruile boholo; e seng matla, empa boholo.

<sup>144</sup> Motha o mpotsitse, nakoana e fetileng, ho re, “Moena Branham, na u lumela u le matla ho etsa sena?”

<sup>145</sup> Ka re, “Ha ke na matla a letho, ho hang, empa ke fuoe boholo.” Molumeli e mong le e mong o fuoe hoo. Haeba u bo hana, u tla lula moo u leng teng. Empa ha u ka bo amohela, bo tla sebetsa ho tlolisang ho khaphatsehang, hobane Molimo ke morui mohaung oa Oona.

<sup>146</sup> Nka letsekana le pealletseng kantle mona seterateng, liaparo tsa hae li batla li leketlile kaofela, e le moketa. Kepisi e hatelletse litsebe tsa hae. ’Me o kena seterateng moo makoloi a lepellang teng, ka limaele tse mashome a mahlano ka hora, dimoutoro li matla a lipere tse makholo a mararō. Ha a le matla a ho emisa baesekele. Ke hantle. Empa e re a butsoe phala eo a phahamise letsoho la hae, u shebelle mariki ha a tsetsela. Ha a matla a letho, empa o fuoe boholo. Motse ohle o mo tšeheilitse.

<sup>147</sup> ’Me monna kapa mosali, ha ke tsotelle maemo a hao, u fuoe boholo ba Molimo, ka tsepiso, hobane Ke morui ’me o tsepisitse ho etsa tse tlolisang tse khaphatsehang. “Ha u ka re ho thaba ena, ‘koqoha,’ ’me u sa belaele pelōng ea hao, feela u lumela hobane ho tla etsahala seo u se boletseng, u ka fuoa seo u se boletseng.” Ha u na matla, empa u ruile boholo.

<sup>148</sup> Le sa hopola mohla O mpolellang motšeо koana, ha thoe, “U tla senola makunutu a lipelō.” Hoba O... Le sa e hopola, boholo ba lōna batho ba Phoenix? O e tsepisitse. Seo O se tsepisang, O a se phethisa.

<sup>149</sup> Joale mona ba teng ba lōna ha le a tšoara litlankana tsa thapelo, ntle le pelaelo. Ba bakae ba kulang le sa tšoara litlankana tsa thapelo, phahamisang matsoho a lōna? Ehlide. Ke hantle. Ha le fēla le batla ho tseba, ha se boholo...ha se matla, empa ke boholo ba Lentsoe, “Lintho tseo Ke li etsang, le lōna le tla li etsa.”

<sup>150</sup> Jesu o tsepisitse, ho Luka 17:30, ke pele feela A Khutla, ho tla tšoana le nakong ea Moshe... kapa Nohe, “Mohlang oo ba ejaa ba enoa, ba inehetse lenyalo; ha ba ka ba tseba hofihlela ka letsatsi leo Nohe a keneng arekeng.” O boletse nako e joalo e tla fihla. Eaba O boela a re, “Joaloka matsatsing Lota,” le ho re, “sena se tla etsahala ka letsatsi leo Mora motho a tlang ho senoloa ka lona, mohla Mora motho a senoloang matsatsing a qetelo.”

<sup>151</sup> Joale shebang seo Eéna, mokhoa oo Mora motho a Itšenotseng ka motho enoa Lengeloi, e beng e le Mora motho. Ruri. Abrahamo o Mo bitsitse, “Elohim.” E ne e le Mora motho, ho Itšenola pejana feela lefatše la Balichaba le chesoa. Ebe O e sebelitse joang? Ho molumeli. Ho moipehi-molumeli, O theoletse bareri ba babeli mono ho ba rerela. Empa ho molumeli oa sebele, Oa ema mokokotlo oa Oona o furaletse tente, ’me Oa re, “Abrahama.” E ne e le Abrame letsatsi...matsatsi a ’maloa pele, hoo. Empa joale ke Abrahamo. “Mohatsa’o o kae, Sara?”

<sup>152</sup> Ho re, “O ka tenteng, ka mora Hao.”

<sup>153</sup> Ho re, “Ke tla phethisa pallo ea Ka ho uena. Ke tla u etela.”

<sup>154</sup> Oh, Abrahama a le lekholo la lilemo, ’me Sara a le mashome a robong; empa Molimo, e leng morui oa mohau, oa boloka pallo ea Oona. Ea hlahisa lesea, hoba Molimo o mehauhelo, ’me O tletse mohau. Ke morui oa mohau. O boloka pallo ea Oona.

<sup>155</sup> Lemohang, mokokotlo oa Oona o furaletse tente, Sara a tšeħa a re, “Linħo tsee li ka hlaha joang? Ke tsofetse. Na nka boela ka thaba le mohatsa ka, joaloka mosali e mocha ea nyetsoeng? Khele, lilemo tsa hae li lekholo. Likamano tsa rōna tsa lelapa li khaolitse, lilemo tse ngata, ngata tse fetileng. See se ka etsahala joang?” Eaba o a e tšeħa.

<sup>156</sup> ‘Me Lengeloi ka...Mora motho ka mokokotlo oa Hae o furaletseng e—e tente, o itse, “Sara o tšeħile ke’ng, ka ho re, ‘Linħo tsee li ka hlaha joang?’”

<sup>157</sup> E ne e le eng? Jesu o boletse, ho Santa Luka 17:30, ho itsoe, “Joaloka matsatsing a Lota,” maemo a tšoanang, pele lefatše la Molichaba le chesoa, O itse, “Mora motho o tla Itsenola ka letsatsi leo.” O entse tsepiso, eo Malakia 4 a re tsepisitseng e tla se bolela. Ho tla fiħla Molaetsa o tla khutlisetsa batho morao ho Molaetsa oa pentekosta ea tšimoloho, le ka lona lehlohonolo leo ba le fumaneng letsatsing leo la...Ke eng? Ke ntsu e mapheo a mabeli, Testamente e Ncha le ea Khale ‘moho, ho otlanya litsepiso tsa eona ‘moho, tsa Molimo, ho phethisa seo litsepiso tsa Bibele li se boletseng e tla se etsa. Amen.

<sup>158</sup> Molimo, morui oa mohau, o ke ke oa lesa batho ba Oona ho tsoa bolumeling bona, “bo ruileng thepa le linħo tsa lefatše,” Mongoaha oa Kereke ea Laodisea, empa O ne o tla hlophisa tsela ea ho phonyoha. Le e lumele, batho. Molimo a le hlohonolofatse. Amen. Molimo morui oa mohau! Mehauhelo ea Molimo, ke lakatsa hoo feela. E seng ho loka ha Oona, e seng molao oa Oona; empa ke llela mohau oa Oona. Molimo o nkħauhele. Bohle re na le maikutlo ao.

<sup>159</sup> Ke ne ke shebile. Kantle mona ntlheng ea setulo ho lutse mosali e mocha. Na u tsoere setlankana sa thapelo mono, leleiti? Ha u na. E re ke u bontše hobane Molimo ke morui oa mohau. O sa tsoa tšoaroa ke lineref, ha u joalo? Hampe haholo, le mahlo a hao a mpefetse. Ha ho joalo? Ke hantle. Joale a tla fetoha. Molimo, morui ka mohau oa Oona, ho u botsa haeba u tla lumela sena. Joale ha u a tšoara setlankana sa thapelo, ha u na letho; empa ha u se hloke. U a bona, ke mohau o u fihletseng.

<sup>160</sup> Mono hantle ka pele mona ho lutse mothoana e monyenyan, ka ntho e batlang e...o lutse hantle kantle mona. O jeoa ke lethopa ‘meleng oa hae. Le sa tsoa siphoha haufi, hamorao. Ha ho joalo, mongħali? Ke hantle. Ha u tsebe ke’ng. Le a u tħossa. Ke hantle. Le hlahisitsoe ke letetetso, ha ke re? Na u tsoere

setlankana sa thapelo? Ha u a tšoara setlankana sefe sa thapelo. Ha u se hloke. Molimo e leng morui mohaung oa Oona!

<sup>161</sup> Oh, moena, khaitseli, lumela Molimo! Se Mo belaele. Mo lumele! Ke hantle.

<sup>162</sup> Mona ho lutse monna, ea sutu e putsoa, o roetse ligalase. Sheba mona, monghali. Na u a lumela? Molimo e leng morui oa mohau oa Oona. U lutse mono ka hernia. U a lumela Molimo o ka folisa hernia eo le ho u phelisa? Uena ea lutseng hantle mona ntlheng ea setulo, ea nchebileng. Ha u lumela hobane Molimo o ka folisa hernia eo, Molimo u etsetsa eona ha u ka e amohela. U a e lumela na? Na u tla e amohela? Ke hantle. U ka e fumana ha u e lumela, hauhela. E, monghali.

<sup>163</sup> Mona kantle ho lutse leleiti, phallo e 'meleng oa hae e a fokola. Empa ha a ka lumela, Molimo o tla mo folisa, ha a e lumela. Ke kholoa a tlil'o e fosa, eo ke taba e tileng. Hauhela, ke thapelo ea ka. Ke bonetse mosali eo leroothong ka . . . Mof. Riley, na u lumela Molimo o ka folisa phallo e fokolang eo? Ha u etsa, e amohele! Amen. Lumela feela. Molimo o molemo, ha A joalo, Stella? Yaa. Ke hantle. Ha ke eso bone mosali eo bophelong baka. Empa, Molimo, mohaung oa Oona!

<sup>164</sup> Mona ho lutse mosali e mong, o lutse hantle ka morao mane, hantle ka motšeо, o nchebile. Eéna, hape, phallo ea hae e a fokola, le eéna. O ne a e nahanne lekhatheng leo. Ha ke eso bone mosali eo bophelong ba ka. Erekaha mosali e mong enoa o ne a tšoeroe ke hona hoo, ntalime. U a lumela ke moporofeta oa Molimo, kapa mohlanka oa Oona? O boetse u jeoa ke pelō. Ha e le 'nete, phahamisa letsoho la hao. Ha e sa u tšoere joale. Molimo, morui oa mohau oa Oona, ho itšupa A phela mona mohahong bosiung bona. Molimo morui oa mohau oa Oona! Amen.

<sup>165</sup> Na ba ka ba teng, ho ka ema baetsalibe ba bakae le ba oeleng mohaung ka maoto a lōna, le ho re, "Molimo, morui oa mohau oa Oona, nkhanheli"? Ema ka maoto a hao. Ke tla u rapella, haeba u lumela hore O batla . . . u batla mohau joale. Molimo a u hlohonolofatse. Molimo a u hlohonolofatse. Molimo a u hlohonolofatse, uena. Ea oeleng mohaung, ema ka maoto a hao. Molimo ka mohau oa Oona o ruleng! Ana u a—u a . . .

<sup>166</sup> Ruri ha le a shoa bohatsu, maemong ana, hofihlela u sa bone hore ena ke eona tšepiso ea hora. Ruri ha le a tšophahana hakaale mokhatlong oa bolumeli, le linthong tse ling, hofihlela u sa bone hobane ena ke tšepiso ea hora, Molimo morui oa mohau.

<sup>167</sup> E ka bang mang, ea neng a eme, ke tla rapela motsotsong feela. Ke batla u etele kereke e itseng ea Evangelie tletseng le—le ho—le ho kolobetsoa ka kolobetso ea Sekreste, Molimo a u fe Moea o Halalelang.

<sup>168</sup> Na e mong a ka ema ka maoto a hae, le ho re, "Na, ke batla ho hopoloa. Molimo, mohaung oa Hao, nkhopole. Ha ke phela kamoo ke neng ke lōketse. Mohlomong . . ." Molimo a u

hlohonolofatse, leleiti. 'Me Molimo a u hlohonolofatse. Molimo a u hlohonolofatse. Molimo a u hlohonolofatse. Molimo a u hlohonolofatse. Ke hantle. "Molimo, morui oa mohau oa Oona, nkhanhele." Molimo a u hlohonolofatse, khaitseli. Na ho teng . . .

<sup>169</sup> Ba bakae ka mona hape, ba reng, "Ke tla ema. Ke batla Molimo a tsebe ke batla mohau. Ha ke a phela ka tšoanelo. Ke phetse ka mokhoa *ona* le ka mokhoa *oane*. Ka nyoloha ka theoha, empa ke batla mohau oa Oona." Molimo a u hlohonolofatse, moena. Motha e mong osele, ea reng, "Molimo mohaung oa Oona o ruileng!" Molimo a u hlohonolofatse, khaitseli. Molimo a u hlohonolofatse, khaitseli. Ke hantle. Molimo o ruileng mohaung oa Oona! Molimo a u hlohonolofatse, le uena. Molimo a u hlohonolofatse morao mono. Molimo o a u bona. Ema ka maoto a hao feela.

<sup>170</sup> Ho re, "Na e thusa ka letho, Moena Branham?" Ehlide. Ema u bone na ke phapang e kae.

<sup>171</sup> Ha u hlile u tiile pelōng ea hao, Molimo ke morui oa mohau. "Ha O rate ha e mong a ka timela, empa e le hore bohle ba finyelle pakong." Molimo e leng morui oa mohau oa Oona! Oho Molimo, re hauhele.

<sup>172</sup> Joale ba bakae ka mona joale, ba tšoereng litlankana tseo tsa thapelo? Ke life? BoA le boB, e ne e se tsona? BoA le boB. Batho bohle ba tšoereng setlankana sa thapelo sa boA, emang lehlakoreng *lena*, 'me setlankana sa thapelo sa B se tla ema kamorao ho bona.

<sup>173</sup> Ke a ipotsa bareri ba itseng ba teng ba ka thahasellang ho nthusa. Ha ba le teng, le rata ho nyoloha, nka thabela ho fuoa thusa ea lōna—ea lōna mona, hobane re tla thabela ho rapela, le ho rapela—ho rapela le lōna.

<sup>174</sup> Sena, Bibele e boletse, "Mehlolo ena e tla tsamaea le ba lumelang." E, monghali. "Ka Lebitso la Ka ba tla leleka batemona, ba tla bua maleme a macha." Na re entse hoo? Ka mohau oa Molimo; e seng rōna, empa Molimo o ruileng mohau ho boloka Lentsoe la Oona. Molimo!

<sup>175</sup> Joale, litulo tsa bakuli, ha le batla ho li emisa hantle mona kapele; re tla ba rapella hantle mona, re sa tlameha ho ba hulanya ba feta moo, lipakeng tsa litulo kahohle mono. Feel, ho lōkile, ba nyolleleng holimō mona hantle. Ruri re tla e rapella, e mong le e mong oa rōna. Molimo ka mohau oa Oona o ruileng!

<sup>176</sup> Na le ka ema letsohong le letona joale, metsotso e 'maloa? Na Moena Brown o tlie le uena? [Moena o re, "O tla hosane."—Mohl.] O tla hosane. Ke—ke—ke ne ke tsepile a tla be a le teng mona. O kae, Moena Outlaw o kae, Moena Fuller o kae? Ba bang ba batho ba neng ba nyolohetse mona le 'na ha ke fihla khetlo la pele, ha re khutleng. Le sa hopola mela ena ea thapelo ea mehla ea khale, re ne re ema mona hofihlela le tlameha ho ntšehetsa maphakong, motho ka ho le leng, ke ne ke fokola haholo?

<sup>177</sup> Ba bakae ba kileng ba etela likōpano morao koana tšimolohong? Shebang mono. Le sa hopola morao mono, ka na ka le bolella seo Morena Jesu a mpoleletse seo, ha nka tšepahala, lintho tsena li tla etsahala. Na ho joalo? Re ne re sa tšoara se joalo letsatsing leo le ka mohla. Empa ea etsahala, hobane Molimo ke morui oa mohau oa Oona, 'me o tšepehile pallong ea Oona. Amen! Ho leka ho koala, 'me ha ke khone. Amen! Ho bokoe Molimo! Alleluia! "Oh, ke thabile ho ba e mong oa bona!" Amen. Oh, banna!

Batho ba teng hohle feela,  
 Ba tukang lipelōng tsa bona  
 Ka Mollo o tšolohileng Pentekosta,  
 O ba hloekisitseng oa ba hlatsoa;  
 Oh, o tuka pelōng ea ka joale,  
 Oh, ho bokoe Lebitso la Hae!  
 Ha se le thabo hore ke e mong oa bona.

<sup>178</sup> Oh, 'na, ea soto, malimabe, sefovse soto sa mofutsana, se kang 'na; 'me joale ka mohau oa Oona, mohau oa Oona o ruileng, ke bona 'Muso oa Molimo o hlahella. Amen. Melao ea Oona e metle hakakang!

<sup>179</sup> Ema hantle, moena oa ka, ka molangoana oa hao. Ha u sa khone ho ema, ho lōkile, ema mono hantle, re tla theoha hantle re u rapelle.

<sup>180</sup> 'Me joale boA le boB, litlankana tseo tsa thapelo, li fole mola ka lehlakoreng le leng lane, 'me re tla ba rapella.

<sup>181</sup> Baena ba bareri, ruri lōna, haeba le lumela ho beha bakuli matsoho, le ka tla koano hantle la ema le 'na kalaneng ena. Re tlil'o rapella bakuli.

<sup>182</sup> Joale ho lōna batho ba emeng moleng oo, ha le lumela hobane Boteng ba Molimo bo teng mona, hore Moea o Halalelang o har'a rōna joale, ho etsa hantle feela seo A boletseng A tla se etsa. Hola ke na le matla ho le folisa, ke ne ke tla etsa joalo ruri. Hola ke ruile mokhoa ofe ho le folisa, ruri nka be ke etsa joalo. Ha ke a tšoara letho. Ke. . . Molimo o abile neonyana.

<sup>183</sup> Ha ke moreri ea mokaalo. Ha ke na thuto e lekaneng ho hloauoa ke le moreri, se bitsoang moreri matsatsing ana, mohla e—mohla boiphihlilelo e tlamehang ho ba boiphihlelo ba thutabomolimo, 'me bo tlameha ho hlomela ka ligarata tse ikhethang tsa bongaka, le tse joalo. Nke ke ka rua litšoanelo tseo. Empa Molimo, ka ho bona pelō ea ka, le ho tseba ke batla ho Mo etsetsa se seng, ke batla ho e ananela.

<sup>184</sup> Monna o mpoleletse letsatsi le leng, ho re, "Ke u hopola u le monna ea lōkileng feela, Mongh. Branham, empa ke lumela botšepehi ba hao bo fositse. U fapohile thato ka bottlalo. Na u a tseba qetellong u tla tsuo?"

<sup>185</sup> 'Me ka re, "Sheba, ke batla ho u bolella taba. Ke tla re ho uena—ho uena u n̄epile, ho rialo maloka le khang ena. Haeba ke fositse, etsoe ke—ke sa lumele joalo; empa haeba ke fositse, 'me hona joale ke itsebile ke tla phela lilemo tse lekholo, athe O tla nteleka qetellong ea tsela, a ntoo re ho 'na, 'Ha u lōkeloe ke ho kena Leholidōng la Ka, William Branham. Kena lefifing le kantle.' U a tseba ke'ng? Ke ne ke tla Mo sebeletsa matsatsi ohle a ho phela ha ka hofihlela ke iketse, le hona. Hoba ke noele khaphu-khaphu ea mahlohonolo a Hae a sa nt̄šoanelang, 'me ho 'na O fetisa le bophelo. Ke sohle seo ke . . ."

<sup>186</sup> Sohle seo ke leng sona, sohle seo ke t̄sepileng ho ba sona le ka mohla, ke se montse lerekong le mohaung oa Oona. Ke na be ke le malimabe, soto, mofutsana, sefov; empa Oa mpholisa ka lereko, hape ke matla ke hakōtse 'meleng, ka mohau oa Molimo. Mahlo a ka a bona hantle. Ke a ja, ke a noa, ke na le sohle seo ke se hlokang. Ha A eso t̄sepise ho 'neha tseo ke li batlang; litlhoko tsa ka.

<sup>187</sup> 'Me ha nka lahloa ka letsatsi lela, 'me ke tsebile . . . Ha ke khone ho bona moo ke tlang ho ba teng. Empa hola ke itsebile ke fositse, 'me Molimo o nkhethile ho fosahala, nka batla ho itulela ke fositse, hobane ke batla ho etsa thato ea Oona. Ke hore, ke Mo rata hoo ke batlang hore ho etsoe thato ea Oona. Joale, polelo eo ke ea tonana, empa ke a t̄sepa le e t̄soara ka mokhoa, ka moea oo ke e buileng ka oona. Le a bona, ke batla ho etsa thato ea Oona. Ke Mo kōpa ntho nako e 'ngoe, O tsokotsa hlooho ea Hae "che," ke nyakalla hakaalo ka eona joalokaha holane A itse "e." Hobane, re tlameha ho kōpa kamehla, "Thato ea Hao e etsoe." Bo-chee ba Hae ba bakaalo feela ka . . . haeba e le thato ea Oona eo, hoo feela . . . E fetisa bo-ee ba Hae ka molemo, haeba e le thato ea Oona ho e etsa. Ke mohla o Mo ratang kannete. Amen.

<sup>188</sup> Ha ke qala ke bua ka Ééna, ha ke khone ho khaotsa feela. Oh, Ke sebele feela, ke sebele haholo ho 'na! Metsoalle, Ke—Ke sohle seo ke leng sona, sohle seo nka bang sona le ka mohla, sohle seo ke lebeletseng ho ba sona, se tsetetsoe ho Kreste Jesu, Lentsoe la Oona.

<sup>189</sup> Bosiung bona ke leboha bopaki ba Moea o Halalelang, bakeng sa Molaetsa. Ke a tseba o ka t̄soha, ba bang ba ka t̄soha ba sa lumellane le Oona, empa joalokaha ke le boleletse, ke tlamehile maoto le matsoho Molaetseng. Pontšo e tsoile, 'me Molimo ha o romele pontšo feela ho itšupa E le Molimo. Molaetsa, kamehla Puo e sala pontšo morao. Mang le mang o tseba seo.

<sup>190</sup> Jesu o tla ka lipontšo le meeka. E ne e le Monna e moholo mohla A hlakisitseng lipontšo le meeka, empa ha A qala a lula fatše ho qala a tlisa Molaetsa, "'Na le Ntate oa Ka re Bang," oh, banna, e ne e fosahetse ho bona. Le a bona? Empa Puo e ne e tlamehe ho sala pontšo morao.

<sup>191</sup> Moshe o fuoe lipontšo tse peli, 'me pontšo ka 'ngoe e-na le puo. Ke hantle. Ke rerile ka eona nakoana e fetileng mona, nqa e 'ngoe, ka, *Puo Ea Pontšo*. E tsoanelo ho ba le e—e Puo ea pontšo. Ke phetoho. E joalo kamehla. Haeba e se joalo, ha e a tsoa ho Molimo.

<sup>192</sup> Ha monna a tsoa ka bosebeletsi bo hlollang bo ilehang, bo fumanoa ka Bibeleng e le 'Nete, 'me monna eo a tsitlallela thuto ea khale ea mokhatlo oa bolumeli, e lebale. Ha ho letho ho eona! Molimo ha o etse ntho e joalo. Ntho eo, ke manna a bolileng a nyeunyang masetlaoka, kapa libokoana-mehatlana, kapa seo le batlang ho e bitsa sona, e qalileng lilemo tse mashome a mane, mashome a mahlano tse fetileng, ba ntse ba leka ho ja manna a khale a neleng motšeо koana lilemong tse ngata. 'Me bana ba Iseraele, leetong la bona, manna a macha a nele bosiuska bong. Ke hantle, u ke ke ua a bolokela moso.

<sup>193</sup> Ha re phele ka mongoaha o itseng o fetileng. Re ntse re ja Manna a macha, Manna a macha ho tsoa Leholimōng, leetong la rōna ha re tsoelapele.

Ha re inamiseng lihlooho tsa rōna joale.

<sup>194</sup> Morena Molimo, U hlile u sebele, Boteng ba Hao. Ke nahana ka mohau, Morena. Re—re sa tsoa U bona u etsa lintho tse ngata hakana! Re U utloile u bua maleme, ho U bona u e toloka, ka batho ba Hao. Oho Molimo, ho U bona u folisa bakuli, ho tutubolla mahlo a lifofu, ho tsamaisa liritsa, litholo tsa utloa, limumu tsa bua, U Molimo o matla le o moholo hakakang!

<sup>195</sup> Le ho bona hobane U tsepisitse sena matsatsing a qetelo. Leha re fumana maipeho a nama, a supa Molimo oa mannete o leng teng, nqa e 'ngoe, e leng oa sebele ruri. 'Me ke a rapela, Ntate ea Maholimōng, bosiuska bona, re ele Molimo hloko hakana re U bone u le teng mona.

<sup>196</sup> 'Me batho bana ba moleng, etlereha ba feta moleng ona, Morena... hoba re etsa sena hobane, re ba tsepisite. 'Me O itse, "Mehlolo e tla tsamaea le ba lumelang ke eona ena."

<sup>197</sup> Mona ho eme baena ba bareri, banna bao U ba khethileng, pele ho motheo oa lefatše, ho ba seo ba leng sona bosiuska bona. U tsebile, le pele lefatše le e-ba teng, re tla ema mona bosiuska bona, hobane U mohlokapheteletso.

<sup>198</sup> Re rapela ke hona, Ntate oa Maholimōng, bosiuska bona, etlereha batho ba kulang bana, liritsa, lifofu, ba shoeleng litho, ba tsoeroeng ke mofetše, e ka bang eng, ho fetang moleng ona, ba elelloe oona Molimo o tsebang lekunutu la pelō o tla ba folisa, ha ba ka e amohela feela, ho talima feela le ho utlosisa.

<sup>199</sup> Monna ea shalimmeng nōha ea borase joaloka moprista feela... sekotoana sa borase, o be a ka sitoa ho folisoa, kaha a sa utloisia seo e neng e le sona.

<sup>200</sup> 'Me kajeno, Morena, ho a tšoana. Haeba ba shalima neo, ho e nahana e ka ba thusa, ha ba na kutlosiso. E holim'a néfetatso ea Boteng ba Molimo bo leng teng mona ho folisa. Aba sena, Ntate. E ke e phethisoe, ka Lebitso la Jesu. Amen.

<sup>201</sup> Ke batla seletsinyana sa piano, ka kōpo, monna kapa mosali, e ka bang mang, ho fetela koo ho letsa sefela sena, "Ngaka e khōlō e haufi joale, Jesu ea pelōnolo," ka kōpo, hohle moo seletsi sa piano se leng teng. Joale seo ke . . .

<sup>202</sup> Ke sa hopola tšebeletso ea ka pele ea pholiso, Fort Wayne, Indiana. Ngoanana oa mo-Amish o ne a lutse, a ntse a letsa piano eo, "Ngaka e khōlō e haufi joale, Jesu ea pelōnolo." Eaba lesea le tlisoa ho 'na kalaneng, le holofetse. Eare ke sa rapella lesea leo, la qhoma le pshemoha liphakeng tsa ka la matha le parola kalana. 'Mé A akheha. Nkhono a lahlela sakatku sa sebakeng, a qala a lla.

<sup>203</sup> 'Me ngoanana enoa oa mo-Amish joale, ea sa tsebeng letho ka Mapentekosta, hoba e ne e le setho sa kereke ea Amish; empa a ntse a letsa. Moriri oa hae o molelele oa lepella fatše; a phahama ka Moea a qala a bina ka maleme a sa tsebjoeng, 'me e . . . a ntse a khema le sefela seo. 'Me likonopo tseo tsa piano tsa ea holimō-le-tlase, li ntse li letsa, "Ngaka e khōlō joale e haufi, Jesu ea pelōnolo." Amen! Ke oa maobane, kajeno, le kamehla.

<sup>204</sup> Joale a re rapeleng joale ka nako ha . . . Joale e mong le e mong kantle mane a rapele. Lōna batho ba ntseng ba feta moleng, nakong eo re le behang matsoho, le hopole, Jesu o itse, "Ha le ka e lumela, le tla fola." Le a e lumela na? Joale ha re se bineng bohle joale.

Ngaka e khōlō e haufi joale,  
Jesu ea pelōnolo,  
Ha A bua . . . (Ha re koaleng mahlo a rōna joale  
re sa bina) . . . o khatholla lipelō,  
Oh, utloang lentsoe la Jesu.

Lebitso le ratehang,  
Ke le letle hakakang,  
Le monate . . . (Ntate Molimo, haola holim'a  
batho joale) . . . binoia,  
Oho Jesu, Jesu ea bokoang.

<sup>205</sup> "E khōlō . . ." Joale ha le ntse le feta joale, O teng mona. Nka lentsoe la ka, kapa u e lumele ka bo-ueno, O teng mona. E mong le e mong kantle mane o ntse a rapella batho.

<sup>206</sup> [Moena Branham le bareri ba rapella bakuli Moena Borders a ntse a eteletse phutheho ka 'mino. Sekheo lebanteng—Mohl.]

Oho Morena, ke a lumela; oho Morena, ke a  
lumela;  
Tsohle li a khoneha, oho Morena, ke a lumela.

<sup>207</sup> Bohle ba lumelang, phahamisa letsoho la hao ka mokhoa ona, ho re, "Ke a lumela." [Phutheho e re, "Ke a lumela."—Mohl.]

<sup>208</sup> Mona ho lutse monna ea lutseng mona. Lebaka la ka ho e lelefatsa; ke bua, o bolaoa ke mofetše. O ikokotlela ka melangoana ena. Ha ho mokhoa ho monna eo lefatšeng ho phela, kastle ho Molimo. O tšoeroe ke mofetše hohle maleng, 'me o tlil'o shoa haese ka baka la mohau oa Molimo. 'Me ekare feela nka... [Sekheo lebanteng—Mohl.]... lentsoe la khotthatso ho monna enoa.

<sup>209</sup> Uena, u tseba lingaka li ke ke tsa u thusa letho joale. U se u tlotse mono, u a bona. 'Me u a... U na le monyetla o le mong feela, 'me ke ka ho Kreste, u a bona. 'Me, moena, u... Ke tla shoa letsatsi le leng, le 'na. U tla tlameha ho tsamaea, ha Jesu a ka lieha. Ke tlameha ho kōpana le uena koo, ho ema Setulong sa Kahlolo mono. 'Me bosius bona...

<sup>210</sup> Le a tseba, joaloka ho thelebishene, thelebishene e qhaulitse seo nako le nako ha re sisinya esita le monoana oa rōna, ntho efe, e hatisitsoe. Lentsoe lefe leo re le buang, le hatisitsoe. Joale, le a bona, thelebishene e pakile hoo. Joale, thelebishene ha e iqalle setšoantšo, e le sutela leqhubung leo la thelebishene feela. Le a bona, ha e iqalle sona. Thelebishene e bile mehleng ea Adama holim'a lefatše, thelebishene e bile mohla—mohla Moshe a parotseng Leoatle le Lefubelu, thelebishene e bile mohla Elia Thabeng ea Karme, le a bona, feela ba sa tsoa e sibolla joale. Le a bona? 'Me joale hohle moo ke...

<sup>211</sup> Khato efe eo re e etsang, le molumo ofe, o bapala rekoto e tla re khahlanyetsa Kahlolong. Khato efe eo re e etsang e tlameha ho re khahlanyetsa mono. Ke tlameha ho arabela mantsoe ao ke le bolellang oona, joaloka moreri. Ke tlameha ho e etsa, hobane Molimo o tla mpatla boikarabelo ba eona.

<sup>212</sup> Joale ha nka khona, nka le phekola; kaha le sa na le nakoana, hola e se ka Molimo. Joale, ke theohile ka le rapella, kahohle kamoo ke tsebileng ho etsa. Moena, ntho efe lefatšeng, eo nka e sebeletsang motho ea lutseng mono maemong ao, nka e phethisa.

<sup>213</sup> 'Me e re ke le botse, le a bona. U—u—u se u folile, hobane Jesu o le tlalehile joalo. Le a bona, "Re folisitoe ka maqeba a Hae." Joale ha u ka khona, ho tsoa botebong ba pelō ea hao, amohela seo, u ke ke oa shoa joale, empa u tla phela.

<sup>214</sup> Joale, le a bona, joale re a tseba thelebishene e haola ka phaposing ena. Re tseba seo. Ha re e bone. Ha re khone ho e bona, mahlo a rōna ha a etsoa, lithokutlo tsa rōna ha li khone ho e thonaka. E qosa chupu e teiloeng, kapa e ka bang eng, kristale, ho e thonaka.

<sup>215</sup> Le Molimo o teng. Ha re 'Mone, empa re Mo tseba a le teng mona. Jesu Kreste o a tšoana. Shebang, O sa tsoa Itlaleha, kamoo A Iketsang kateng. Joale, ho latéla pholiso, holane A ne a eme mona joale, A ke ke a le etsetsa letho, le a bona, ha ho ntho le

e 'ngoe. Hola Mora oa Molimo a eme mona hantle, athe O eme mona, O teng mona, empa A ke ke a u etsetsa letho ho feta, kaha A se a Inétefalistse mona. Le a bona? 'Me O teng mona hona joale, ka ho tšoana, ho le folisa le ho le phekola.

<sup>216</sup> 'Me leleitinyana leo le mpoleletse, ho re, "U ile ua kōpa hlohonolofatso, le ho porofeta kapa ntho e iteng," holim'a hae, ha thoe o tla fumana lesea, a lutse setulong seo sa bakuli. 'Me o e entse, o ile a fumana lesea.

<sup>217</sup> 'Me joale leleitinyana le lutseng mona. Joale o oporetilo e kotolana eo, ea mo shoesa bohatsu. Be, re bona lintho tse ngata tseo li etsahala. Joale, khaitseli, mothoana, ke a tseba u Mokreste oa makhonthe. Lebaka la Molimo ho u lumella ho lula mono, ha ke tsebe. Ke a lumela, e ka ba, ke hobane u na le... Tumelo, u—u ntse u leka fumana tumelo, ho tsoa mono, u a bona; empa joale sheba, re mpe re se leke ho e fumana, re e fumane hona joale, le a bona, re mpa feela—re tla fihla mono feela. Ke phetho se leng teng, e tla qala hona joale, 'me re tla fola. 'Me lōna batho ba lutseng litulong tseo tsa bakuli kantle mono, eng, kapa—kapa sohle seo le leng sona, le hopole feela hore Kreste o teng mona.

<sup>218</sup> Joale u re, "Na motho o teng, na u bona setšoants̄o sa ka se hlahellang." Oh, e.

<sup>219</sup> Esita le Mantsoe a Jesu Kreste, ao A buileng mehleng ea Hae mona lefatšeng, a ntse a feta ka phaposing ena. Le ka mohla ha le shoe. Ba tsebang taba eo e le 'nete ea mahlale ba bakae? [Phutheho e re, "Amen."—Mohl.] Be, ke eng? Ebe moo Moea o thonakang Lentsoe leo le ngotsoeng, 'me ho Le bonahatsoa. Oh, khanya!

<sup>220</sup> O teng mona. O mona hona joale hantle, Morena. Re mpa feela... Re bone tse ngata hakaale, O entse tse ngata hakaale, ho fihlela re batla feela, le a tseba, e batla e re khopa. Hola re ka elelloa, e seng ntho e itseng ea khopolotaba, polelo e itseng ea thutabomolimo; empa bopaki boo A tšepisitseng A tla Ipontša ka bona letsatsing lena, ke enoa O e tlaleha hantle mona ka pel'a rōna hona joale. Ke ntho e babatsehang hakakang! Na ha e babatse? [Phutheho e re, "Amen."—Mohl.]

<sup>221</sup> Joale u lumele. Na u tla e lumela? Ho lumela u ke ke oa shoa. U tla phela, 'me u tla tlota Molimo. U tla tlota Molimo. Na u kile oa kolobetsoa? U Mokreste na, na u eéna? 'Me u Mokreste. Be, u batla ho phelela tlota ea Molimo. Tloha ke hona u phele, moena oa ka. Ka Lebitso la Jesu Kreste, phela!

<sup>222</sup> 'Me, khaitseli, u batla ho tsamaea tlotsong ea Molimo, le ho hlokomela lesea la hao; tsamaea ke hona, khaitseli, ka Lebitso la Jesu Kreste!

<sup>223</sup> Uena, e mong le e mong oa lōna, le etse hona hoo, ka Lebitso la Jesu Kreste! Le se ke la lebala Westward Ho Motel ena mona bosiung bona, Boteng ba Molimo bo tsebahalitsoe mona. Ha A shebe tšobotsi ea motho. O batla feela hore le lumele. Na le a Mo

lumela joale? [Phutheho e re, “Amen.”—Mohl.] Amen. Molimo a le hlohonolofatse.

<sup>224</sup> Ha re inamiseng lihlooho tsa rōna joale. Ha ke tsebe ba khethile mang, ho—ho qhalanya batho. Moena Mushegian mona, tloo mona hantle, moena. O tla koala ka thapelo. Molimo a u hlohonolofatse. 

*MOLIMO E LENG MORUI OA MOHAU* SST65-0119  
(The God Who Is Rich In Mercy)

Molaetsa wona, ka Moena William Marrion Branham, o rerilwe sethatong ka Senyesemane, Labobeli mantsiboea, Pherekhong 19, 1965, bakeng sa Full Gospel Business Men's Fellowship International, Westward Ho Hotel, Phoenix, Arizona, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2020 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)